





清容居士集卷第二十五

碑

猷州交河縣先聖廟碑

尊聖人而親之有為廟之道焉廟也者享之以寧其神  
者也氣行於太虛莫窮其神天地日月星辰久而不息  
者也聖人之道與天地並而其炳然立言品節備具則  
猶夫日月星辰也人生則有死渙而復之亦必有道著  
其思以立其誠焄蒿悽愴沒世而不忘故立廟之制親  
盡而祧一而壇墠其逾遠者情不得而推也自唐以來  
祖立先聖廟天下郡縣皆以上丁致祭升降迎享有似



夫宗廟而復琢範土木象其神明故其廟也有堂無廂  
重屋四阿具體而制簡禮緣人情敬生於其心其從來  
也久則今之為廟者不得而廢矣夫子嘗曰祭神如神  
在神無在無不在有其誠斯知神矣獻州交河縣舊有  
廟學廟狹庫不足展事皇慶元年王君某為縣主簿治  
事之隙日率胥徒入學以受講乃與其令長僚屬勸士  
民出其贏財廣新孔子廟越明年十月告成維昔獻王  
纂修古文補正六藝今州以是得名儒術之士宜為歌  
詩以侈厥美於是鄉大夫刑部員外郎葉蘇君俾志經  
始且請繫之以詩、曰兩河舒、民迄奠居理政孰先

學廬是圖禮殿弗度墉棟庫穿我寃我環築營燥堅嗟  
爾士子康色以喜出粟載車以相胥宇松柏甃石繼鐵  
丹碧翼然崇、聿完有恤王君之始民不知至暨來肆  
成其徒烝、仰止獻德胙土啓國絕續闡微維聖是則  
聖有載籍德修靡忒毋辨以夸毋質而阿洋、在庭若  
聞厥聲視而新宮以淑以繩

獻州交河縣三皇廟碑

司馬氏作史記斷自五帝世之言三皇者著天地人之  
說而強名之孔安國序書以伏羲神農黃帝為三皇或  
者疑焉晉皇甫謐述帝王世紀謂八卦之畫切於人身



水火升降得以有象百病之理得以有類神農皇帝設  
五穀藥石為生民本謚之論是殆為醫家者流而專言  
之也唐天寶禮官定議尊古帝祀三皇適與謚合 皇  
元啓運詔天下郡縣立醫學因奉三皇以廟春秋謹祠  
之昔人有言曰庖犧神農順民之性育之者也黃帝除  
民之害救之者也乾坤之道合變以成民用之而不知  
象而祀之凡所以各得其正者也誠在中矣宮居粒食  
順形色之正將以養而安之忘其和平蒸其所之疾疢  
生焉博施濟衆堯舜猶不能以全其功則夫三聖人者  
法施於人而祀之誠宜也皇慶元年保定王君來主交

河縣簿三月朔日有事於三皇敝垣蕪壇虛位望祀拜  
伏瞬息而禮以告成碩瞻惕若謀于長令語於若屬曰  
象設弗嚴其何以肅衆神道設教其會通之道也乃即  
其攸廣而崇之削荒黜幽楹甍嚴密資鳩於民後成于  
工相胥以勸而莫知其勞為鏹三萬有贏其用之不給  
者悉輔而足之明年殿成三聖蒞、有嚴有飭遂落而  
祀之維我 世祖皇帝神武不殺混合寰宇憂民之不  
全其天崇祀廣法俾尊其道術幸已厚矣不幸或罹於  
非辜此誠牧民者之責餘何咎焉民有輿言交河之政  
有匿其婦而誣其姑者維我王君迹而推之婦姑以完



盜狃攻劫吏隱之使緩王君之至越境斯得嗟夫六氣  
之流行壽夭不齊上之人尤憊然極閔之而不至陷  
而攘之則其為疾沴災旱者吾不知其何心也王君為  
政若是楠職在太史紀成字而附書之

奉化州三皇廟碑

馬侯為政急先崇儒建尊經閣成作而曰學無田曷足  
養士表圭田租勵之於是鄉之儒合言茲寔吾黨耻鄉  
校日毀青衿賦焉館粲有加士子知教盍助田以成侯  
志侯復曰先賢遺則惠養存沒規盍敢湮廢正藉端本  
耻格貪戢於是始言曰噫世祖皇帝行仁肇邦萬世

永憲今獲守茲土疾沴不治黎民何辜乃建三皇殿初  
殿在廢觀址後徙寺旁庫隘弗稱詢圖考初厥地堯亢  
遂廣土而興之百柱翼成萬瓦鱗比厚者效泉力者輸  
後官不出賦而端然光尊者老贊企願紀其建立以彰  
侯績抑嘗聞庖犧闡極人居其中靈根湛純萬化是生  
坎離致用窮夫陰陽之机壽夭不齊彼實戕竊維大聖  
憂之樹藝五穀輔之以醫藥剛柔燥濕各施諸用神農  
之功也因其厚生迄於傷生以憫以原為之經問教之  
以知惧使各盡性命之道則夫黃帝之功詎少矣哉三  
聖炳著尊祀肇唐皇甫謐之論合於醫說道不虛矣為



作樂章俾歌以祀表侯於無窮侯名驥德字致遠官奉  
議大夫明爽幹飭吏民畏而愛焉是役也州之官咸佐  
之鄉老皇甫簡董後訖成前門九楹廊廡齋序二十八  
楹講堂五楹禮器備充圍繚丹堊咸曰美哉歌曰判  
鴻濛精一中八方圓握以通稽聖作逆不逢神之游雲  
霓從嗟彭殤曷恣縱簡差一指厥蹤玄籥啓人喬松煌  
煌大聖萬世功天昭日月星變化周純粹精木石  
土金盪至靈飛走食物各受令一日屢蘇民乃修齡覽  
九州雲泠是州秀淑守著能壯具肥酒齊馨日出  
作海宴息守厥故常民用不極何顛償自傷縱恣作慝  
帝有憂筆載籍目視毫釐脉寸尺智者驚保厥德雲龍  
之髯杳無跡祀靡數千萬億

衢州重修三皇廟碑

混沌既判民生之用日滋制器創物首於三聖詳見於  
宣尼之繫易儒者皓首焚莫能以究周外史掌三皇書  
秦厄既盡而其遺言間見於諸子可得而考者唯醫家  
者流見之天經時訓書禮之準也察其循環考其氣運  
不悉是不足以言醫之本也至於推萬化之原別九州  
之宜調神嗇精按摩導引湯液炮炙無一不究地利土  
膏率有合於農書之說若是者其繁且難有甚於吾儒



則凡為醫者良不易言也小司馬作三皇本紀其精約  
不出於大傳而荒誕不稽悉得以訾病史遷之不作良  
有以也伏羲神農之書見於易黃帝書具在有依仿而  
為之者亦不失本旨自唐肇建三皇祠世祖皇帝遵  
舊令遍祠州郡推仁濟衆比合前聖泰定元年夏三衢  
郡侯赫斯趙侯仲禮僉曰天子神聖不殺稱上意俾  
洽於羣生莫若立醫學於是與府判官定住君勸糾于  
其徒爭輸幣以助不三月殿以成告繪象有嚴禮器畢  
具惠官有廬校官有居閱明年廉訪副使真定白侯鐸  
拜謁廟學首肯口贊且割官沙田為畝若干以奉時祭

咸願刻石以著永遠繫以詩曰太素絢縕品物類分  
經緯五行濟用立勲范、開元通幽合神炳諸典墳是  
究是勤盪摩三光區別九土沮洳海冥或折或沮潤澤  
滲漉順而居處正陽昭晰以保純嘏有簡斯彰翫覈纂  
組民用不知其仁如天大帝述明播於垓埏春臺以登  
鴻澤日宣嘉穗合畝采鱗游川俾絕癘疵享其大年三  
衢之宮伊侯所築濟、有徒惕若奉玉斫精韋編以介  
蓋穀侯云去矣祝彼千祿我庸作詩相祀是肅

饒州安仁縣柳侯廟碑

古昔祈報之禮得行於州黨閭里民神相通禦捍於無



形厥有常祀一有水旱疾癘為其所憑依者尤卓然偉著五行之精成於太素摩盪輻輳主宰以名國有典禮莫得而僭維神依人以行寔有姓氏烈山氏之柱共工之勾龍周之先后稷死為其主後又擇功德之高者代而承之噫積虛以為氣、散以為變居陰假陽人鬼之化行則凡前之列於祀典者皆本於是 皇朝列聖下制詔以通幽潛遺德著功表見郡國雖數千百年皆尊顯從祀至大二年崇文弘道玄德真人吳全節蒙被殊遇推崇其親退伏自念昔為孩提黨榮族醜從我父兄觴而祝之繫神是賴神之闡微肇唐咸通至宋宣和以來由

侯以王盼蠻休嘉鄉大夫湯巾炳志於祠下矣今歲時阜康神靈熙、祥風甘雨莫窮其徵犬牙接壤咸稱神效願上其事於禮部全節敢稽首集賢敷奏 天子以昭神惠秋七月 武宗皇帝御朝封顯靈溥惠冲祐真君命祠臣宣制而褒錫之是歲真人歸至安仁縣以制書授神及饒國公饒國夫人吏士再拜吳氏長幼亦再拜禮成還風交雷挾雨來應安仁之人或言曰明有禮樂幽有鬼神孝以揚之誠以昭之茲邑之美一舉而兼備孝生於心神之相之孰使之然哉縣長吏將刻神制書於祠真人屬為記按舊記真君姓柳名敬德乃為作



迎享送神詞三章以廣民思詞曰 結玄雲兮文虬的  
容與兮山椒光晶熒兮橫流帝鼓導兮前驅山之阿兮  
神居迎羣睇兮與留儼素容兮潔貞佩冷音兮始停  
筍席兮翠遭棘七兮紫搖露零兮隕珠嘉薦湛兮以  
陶揮上牲兮吸秀芝巫揚廷兮靈之娛靈娛兮心降日  
簡兮益康 日懸車兮松冥千童慄兮控輶鼓坎兮  
輪砰恍欲去兮心不寧神居兮山承宇汝居兮山下神  
詎去兮愁汝執玄德兮歷九疑超無為兮終焉以歸

徐州呂梁神廟碑

神禹水功龍門呂梁最艱聖人述書隱而不言惧荒恠

以汨真也步於上帝受圖於河其事偉著豈誣也哉余  
宦京師過今呂梁者焉春水盛壯湍石瀾漫不復辨左  
迴右激舟檣林立擊鼓集壯稚循崖側足負綆相進挽  
又募習水者專刺擢水涸則巖岬畢露流沫懸水轉為  
回淵束為飛泉頃刻不謹敗露立見故凡舟至是必禱  
於神、固靈矣夫集誠以致神靈由衆成往之自信不  
惑者猶感悼自恐則今之所謂祿利奔走而不息寧得  
無慊於其中也耶昔 世祖皇帝征南絕淮夢神扈蹕  
以行 詔所至立護國祠呂梁故祠相傳歲久已此邦  
之人目其湍險復增重之由是南北之舟至于祠下必



禱焉彭城隸歸德太守因君以事謁祠下肅瞻有加乃  
命立石以侈神績於是鄉之耆老鄭安仁復廣其廟基  
象設密嚴棟宇軒靚薦酌登降嚴飭有秩遂介提管錢  
唐姚君具圖狀願刻其事于石余待罪太史觀前代職  
方神祠徐州有廟曰孚濟曰顯濟皆曰龍神呂梁信天  
下奇險處也非神孰尸非龍孰居嶽瀆有祠不以姓氏  
著呂梁為河下流奔赴南海一息千里昔之神受令神  
禹顛微無常代謝上下隨運以化則今之神猶古之神  
也皇朝一四海貢輸金珠綺繒犀象水土精翫之物悉  
出東南舳舻相啣晝夜不絕道必由徐州神司其職訖

罔敢替怠依神以行相戒無虞神任匪輕矣乃作詩曰  
首河崑崙厥行靡恒或伏而舒或迅以凌在昔堯帝  
孟門震騰授禹以圖百神罔不承九埜既疏沈水渾  
挾河以行北東斯奔積鐵懸壁怒雷赴川如雷斯注如  
蛟斯騫自涯刊山訖達其源河既南矣帝跡眇漫赫  
世祖威神耀天爰率貢琛萬桅盤旋引梯從繩以登以  
升菴歌稚和鼙鼓受聽權夫佐前水師試命曰吾神是  
依舍神則病駢士子亦有商女爰集宇下醮酒致祀  
金龍蜿蜒以肖起止導其棘流如席如砥此邦之人仰  
神之來昂石松雲旂離匪唯護之將永綏之山川



出雲古言祠之崇堂豐堵耆老相宇戒而叫囂毋作神  
侮拾級有叙勿黷貨以沮神告萬年 天子受祐

奉化州開河碑

奉化諸溪至龍潭畢會汪洋衍漚陂塘澗溝合流赴資  
國紆行凡六十里始達於江歲霖雨不時溪江相迎上  
下交射漫流田堤或漂民廬舍昔之為政者惧焉於是  
築埭善坊潦至則泄旱則潴以漕輸由資國埭注市橋  
循三山為廣平湖凡言湖通畎澮也湖之下有斗門必  
嚴其水則至是通鄭家滙古有陰溝或為滙溝皆取以  
達水今言滙名之省聲之訛也溪至是循明山稍折為

楊橋水以折始善行將達江復限之為縣門曰進林曰  
常浦又益限之以埭曰車耆提閘有程則水旱不病今  
之善吏治者挈一奉公上不自保政不能及此廣平馬  
侯驥德至州曰 皇元陞江南縣為州實租戶口戶繁  
租瘠何以稱綏惠田疇蕪闕茲惟殿最首吾視茲土抑  
溝洫漫滅以害吾民耶遂窮上源首資國耆老咸言市  
橋達車耆有故河往來舟楫聯絡今趨江以行驚駭濤  
浪商賈不赴而市用益匱濬廣復舊則民其有瘳遂遵  
市橋至陳橋具畚鍤表深廣未及終日而遺石斷絕皆  
奮蹟儼著至何家埭或曰是郡乘不登積為豪民利水



至是當行何障固焉於是決堤仆石埭復置卒守水門  
亦如之易資固埭為水門別立小柵以謹通塞廣平增  
斗門志舊有贍卒租亦復之於是昔之言紆行六十里  
皆得舟行以達于江矣史遷作河渠書能吏所紀僅一  
二數謝太傅守淮南水利博濟則自方之以名伯謝公  
偉績迄不廢焉侯之政良近矣乃係以詩俾勿墜詩曰  
閔、汙萊舉趾厥艱婦饁子任火墾水芟相彼高下  
粵昔廡蕃有限相之有泉養之崩奔交來設險以防彼  
防弗亟時其雨暘謀於在楚集作會節低昂疏儲究爾  
墜過饗強恣專訖孰俾是罰焉侯自南宣承皇風相攸

以圖鞠草茂豐耆艾交謂茲焉商功千鍾剖壤頽隄赴  
壑宛其遺基白石鑿、復常彌堅匪夸以丕作泉流湯  
湯陰洩陽瀦江流馬奔悞而舒徐千帆縈紆入於市區  
河既復址侯斯戾止嘉穀羨穰甘棠疑、維河之新告  
來者勿替

### 碑陰

凡大工役必資僚屬長官某同知某判官某吏目某  
寔僉贊之州民之耆老大家某等歷考舊蹟且佐厥  
役吏奉令曰某等董工庀程州之南復有梁家灘  
磧戚家溪悉濬治之足溉田萬畝開河績最著庸



附碑右以見侯政小者亦若是

許州衡君去思碑

至元初詔議立五事為牧民根本後數歲憂其有不奉行者輒摠覈敦厲又時遣重臣循行以振植之大德七年分命宣撫使糾嚴黜陟多罷所居官獨未聞有治行第一入徵為謀議邇臣者使者以功狀上丞相府、下東曹掾、守法謂事任固當是求狀入書度不復省由是註墨抵青歲率常書於憲部夫法不足以成政先王馭臣必先之以序爵其不幸而奪廢之者誠不忍於人也民為天下本郡縣守令常長於民、病其長歲有所

黜率夫下之民常不善其長民獨何心哉余每過通邑大府碑首高下表植衢道讀其行事無一不皆古循吏而焯、在人耳目又若相反甚者謂惧其威使而以媚夫人之為也俗媮而日艱濟之以淺薄之論上益以不信則是守令考課蹈規襲常安所從超越哉皇慶癸丑秋七月 天子遣御史分察天下牧民賢否咸屏息俟命國子助教許昌趙君師顏言衡大夫氏守許賢解官三年矣其承大夫者亦已去過時而政存可以登紀子職在太史不溢美不希諂宜表石以昭永毋固辭楠謝不敢則又曰余叔父廉訪公師表河南置論少許可言大夫



賢無異語誠不憚書衡大夫事第以州里嫌故遂雅屬  
子楠始謝不辭於是退以其郡士劉君瑞耆長郝守寧  
之狀撫而叙曰大夫為州質靜無亢異視民便害默計  
而成除之州賦戶二百歲久亡絕無所徵別輸它民以  
道責民莫敢訴許為要衝遞馬戶率多逃去竟三歲以  
民籍戶四十二代之戶代而民籍徭調如故大夫請於  
官而悉除之厚風俗敦尚孝讓考漢魏塚墓若陳太丘  
而下立鄉賢堂以祀於學復構廊宇以庥諸生而使之  
竟業臨潁縣有鄧艾屯故地河南撤大夫按視將屯之  
大夫署筆曰鄧艾故屯由魏下千餘歲未嘗復今有民

若干耕其地墳壑居室環地左右一旦官墾闢大不便  
願俾民以已耕田歲入官賦猶屯田也河南是其議民往  
謝之大夫曰吾職也何謝為今世揭然以商權為仕  
進路使大夫廣屯穀名得十萬石顯要可立致不忍數  
百民命為備許人之思大夫宜社而祝之相與望其儀  
於天朝以德我許人者日永久乃繫之以詩以篤不忘  
大夫名佐字君用廣平人詩曰瞻彼具茨英其雲不  
稷不徐粵惟邦君邦君之來我民不聞曰秋而嘗曰春  
而耘木之龍嵒維侯之宅侯轡在掌言戾於學有挈有  
任亦州其角亦飲其醕言攷耆耄潁川之流其下黍稌



嗟余遠祖及我鰥寡是播是藝曷余敢震侮潁水之湄  
戢、其牛利言鼓簧將復其陂、云當復云誰之來邦  
君痛、維衡大夫大夫言邁匪愠斯怒有翬者居有墳  
者墓咎匪我執言遵其所陂既完矣大夫旋矣熟而豚  
肩進其粢矣曰我不敢嘗爾歸爾鄉墓門之柏烏飛彭  
彭中田之廬倚桐稜、云昔不如今永歌以康侯歸其  
組三載云遠許民之思復日以旦侯車在東彼從如龍  
侯車偃里誰為之朋有弁斯綏大廷團、盡瘁在公匪  
食其殮式昭去思攻珉以鐫嗣初維終慎永我傳

華嚴寺碑

太祖皇帝肇定區夏視居庸以北為內地戶族散處皆  
安其簡易在 憲宗皇帝時將有事西南底慎舊章建  
置靡違時則 世祖皇帝治軍和林相厥地利曰維滌  
陽展親會朝茲為道里得中稽衆契龜僉告允吉城而  
名之曰開平焉歲在庚申 世祖承大歷服建國改元  
削僭靖亂宗王殊邦奉貢效牽咸會同於開平由是定  
為上都大興為大都兩京之制協於古昔矣省方有常  
庶職攸叙商旅子來置而勿征首建廟學軋良二隅立  
二佛寺曰軋元曰龍光華嚴復立老子宮於東西化俗  
警蒙相須以成具訓淵遠將垂憲永以為民則 仁宗



皇帝在東宮如華嚴惕然永思粵惟皇祖置慮弘廓建  
都功業弗克崇闡紹開是我子孫不大彰顯爰命守臣  
某撤而廣之踰十年將成仁宗陟方繼天體道敬  
文仁武大昭孝皇帝北巡狩回上都首幸華嚴若曰  
列聖在天神合一朕罔敢有替述修聖明將於是  
有在廣植冥福神御周流宜得以屆止其以先帝所  
構殿鎮於後維五方佛像在世祖時素有感異復廣  
大殿以居之梵相東西挾翼以從凡尊事棲息悉如其  
教以備又別賜吳田百頃安食其衆至治三年夏六月  
丁卯丞相入宿衛上都留守司同知臣某傳旨命翰

林宜為碑紀其成績俾萬姓蒙祉庶得以昭朕奉思臣  
楠竊以為天地生物無心以成維聖人有憂則曰物  
有不齊皇極是訓大雄氏亦曰性本至善遷以隨欲  
由妄生性日益昏故為物為變至於摩盪膠轕生死靡  
分於是有懺解之說焉有追崇之說焉使生得以斷死  
得以離則本性湛空無有垢累道奚病矣華嚴設辭以  
富貴為喻終之以返真復初俾世之所景慕由境以入  
因境而悟入於無相其於喻也深有旨矣世祖命名  
亦將以警夫迷俗愍濟羣動與前聖相合者寔在是聖  
聖相承靡有銖異臣楠屢從屬車聞首主是山者曰至



溫師以妙密縝緻為本行傳宗洞山與太保劉文貞公  
秉忠為方外交磊落有大計因得見世祖於潛邸陳  
對明朗遂大器之六傳曰惟壽今授司徒際遇隆赫於  
法祖有光壽能文辭守其道專固則永以傳謹再拜稽  
首為之銘曰於赫世祖武緯文經廣莫相攸堅墉斯  
城鑒觀羣生厥性有恒驕鷕忿鬪失常是行沉昵昏惑  
執妄是成維政與德具訓以敬善本性初為明為靜猗  
與覺王功始戒定或喻以空或設以境空解境悟真慧  
永證魏煌華嚴窮珍極瑰龍伏藻井雲凝瑤臺積香浮  
浮側瓴枚、耄稚畢觀心掉膽摧相既永離虛空如埃

世祖稽古是則是效暨於仁皇益闡乘教維皇御

極承志廣孝曰列聖在天鴻績靡報頽瞻咨嗟展飾殊  
妙錫福兆民列聖之心拯彼大迷覺王具陳謨烈顯  
承如歲之春物無癘疵膏熙沐淳億萬卜年刻銘堅珉

興福頭陀院碑

興福院在都城保大坊北院既成其主僧尼捨塵以其  
狀來謁曰捨塵王姓膠州即墨人也家世素奉佛今之  
言佛教有三禪以喻空教以顯實律則攝其威儀禁妄  
絕非鼎立以陳融會莫究惟頭陀教吾佛宣演形色自  
然泊其紛華而悲惱集焉外守或懈內持益離參而範



之將釋諸塵以成安樂若是者誠有端緒矣教始於西竺盛於齊梁 皇元建国今其教凡十傳捨塵始與其徒劉普照誓志游京師刻意問道日惟一食精嚴自牧以勞後為調伏非薄為精進草屨安寄束身堅忍至元中今平章政事王公毅樞密副使吳公珪福建宣慰使李公果見而異之始買今院地至大德 年平章政事賈公某邇院居審捨塵積行無退意遂與其夫人林氏引見於 皇后下教出財帛建其殿曰慈尊俾開府知院月魯公暨賈公奏其事於 皇帝 皇太后咸曰可其悉以 皇后私府輸助之延祐五年院告成復奉宸

旨禁護而掌其教者錫名清修妙行以褒美之是役也齋庖廡室皆捨塵所鳩建嘗謂釋氏之說福田利益姑警誘盲駘若曰離愛辭榮非感物而動者也真性虛湛奚假於外則其說近矣詞曰 粵昔能仁蟬蛻侈華網縕泰始雪霜勵磨厥性眇微五采眩訶毀形壞衣其儀不頗空假廣陳蕩恣斯病佩規帶衡迄莫內省茲惟艱哉爰叅以竟惱由樂積煩以欲騁除彼垢紛曰執中無競女德效坤靜於鴻濛維大雄是師頭陀是宗人憫厥芳熙然以克善士日來格於羣公 三宮清穆昭事孔肅鑒觀宇縣作極錫福夸榮逐魂是究是度秉持法權



俾民不黷伊教之興泊然續承千甍固室百礎拱楹式  
尊其初匪維誕矜戒爾後入戰兢永寧

清容居士集卷第二十五

清容居士集卷第二十六

神道碑銘

武義將軍梁公神道碑

梁公諱禎字用之大名元城人父金吾公千為大名兵  
馬都提管既卒長子汴襲職會用兵江南復籍新軍別  
擇將家子統領中書樞密二府議以汴兼領公憫然曰  
兵事至重寧能使吾兄獨受責耶禎且行死國效命弗  
辭也二府壯之攝授以新軍千夫長俾鎮睢州帥領兵  
將渡河攻宋、將夏貴迎拒遂領所部分擊斬首若干  
級帥上功狀拜為真中統三年李璫叛攝本軍帥出擊



功益最擅受擒方壇叛山東時調發旁午壇善戰故將士多失亡壇受誅軍帥俱恨之議悉戮其黨公密白宗王哈必赤曰壇逆黨非土著俱東南狂士宜汰擇以安新土宗王然其言從攻襄樊功益著加授武畧將軍至元十一年鎮邳州十三年王師渡江州郡望風下常州獨守世祖皇帝命大帥率堅銳併圍之州嬰守益固有將築橋登城弩中將死檄公代將即輦木石齊城雉剗其險塹緣附以登城陷第功授武義將軍佩金符後改鎮嘉興羣盜出沒江湖伺疑釁竊發獨展誠撫綏申令飭罰使不能少越繩墨會歲大飢捐已儲粟

以食餓者郡益寧靜性沉默善計事天性孝友出於自然始公之考金吾衛上將軍當金亡時傍邑盜起侵掠金吾率衆列柵守鄉土天兵南下越境率父老持牛酒犒師城以降得完宋將彭斌渡河城中大震搜其首亂者誅之辛卯歲郡將蘇椿叛入南大將阿朮魯怒將屠城金吾率宗人悉輸金帛詣軍前請命卒獲免公之妣張氏訓整有則金吾以兵亂失元配董氏踰二十年董氏還夫人即歸家政退處裕如也噫觀公卓然成就蓋其家教有自再世樹德傾身出口活人於大難其豐報良有以也王父而上兵難事遠不獲考至元三十年



未七十願解兵致其事大德元年正月某日卒於里舍  
年七十有一其年四月某日葬祔大名府西南白水村  
之先塋娶張氏大名織染局提舉津之女子紹祖襲爵  
佩金符仍鎮嘉興嚴重遠慮鎮過表慝悉不使入境後  
鎮烏江詢盜踪跡在海浦遣兵擒磔之郡鎮肅然延祐  
四年、六十終於軍四月某日祔先塋公女二人長適  
李居忠州路照磨次適張鉉濬州判官紹祖娶天水  
郡侯秦穩女生子女各一人曰成襲祖佩金符娶太名  
府安撫使宋天祐女、嫁承直郎佩金符潁州萬戶府  
管軍千戶劉輿、之父中順君今為雲南屯田萬戶府

同知桶與之游最稔善議論嘗言昔時離亂大名城  
中幾駢首就死獨賴梁金吾得全活空郊敗井隱然鋒鏑  
遺跡猶在厥今梁公子孫世顯抑為善之報善有傳往  
史良不誣也輿以事狀來請銘乃不復辭銘曰草昧  
肇區雷雨風驅崩角喪元孰完厥居業、單壘斧鉞就  
屠壯哉金吾請命發途稽顙瀝血氣填以獻春永朗日  
稚菘夾扶或偃或興聚其室廬是生武義趾美以繼粵  
唯叛臣率黨狂獠交兵飛芻靡有寧歲既殲彼魁乃徒  
斯難武義曰吁罪有等第且磔其兇此土何戾再世興  
仁陰功齋、如璞斯玉如山斯雲大田多豐曷籽曷耘



皤、餘齡終樂里粉靖共以儀不瑕以溫金符後先祖  
曾子孫白水之域松柏茂直為艱斯通爰表初值大名  
之城大葺日隔永言金吾曷其有極煌、譜宗接佩踵  
焉有來墓門肅立以式公德允昭後裔承則

資善大夫資國院使贈資政大夫江浙等處行  
中書省左丞上護軍順義郡公謚貞惠王呂伯  
里公神道碑銘并序

至元二十九年 世祖皇帝詔立肅政廉訪司監治諸  
郡濟南陳公 實治慶元按覈官吏大小餘百人故工  
部尚書資國院使順義郡公時為治中獨受委任條其

不便於民者上府力去之會大飢乘驛詣行省言慶元  
瀕海地陘隘歲熟猶仰給它郡非官賑給將移徙不便  
執政然其言為發粟四萬石後為廉訪副使復治慶元  
遺爰炳著菟糴一口迄稱叙不置大德中楠備員翰苑  
屬時公為侍從每得奉議論必歷問衣冠緒族倦、於  
奮治彌厚公薨將十年其子和上以儒雅善正論擢監  
察御史楠亦待罪集賢相與言公遺事御史則曰子寔  
知吾先公為詳且神道之碑未樹子宜為銘楠謝不得  
辭遂次其官闕世譜而為叙曰公系出玉呂伯里氏諱  
伯行大父阿魯家西北部世安其俗精騎射父忽都勇



冠軍伍 天兵定中原因從征冒陣畧地以積功領南  
宿州軍分鎮蘄縣後家於大名路之清豐縣焉公幼歲  
失父母夫入徐氏躬牧蒔紉織以贍稍長命從學里中  
張蔡公尹大名見而奇之後從丞相阿朮公征襄樊南  
渡江率先登復從丞相阿荅海鎮揚州議以州所領四  
萬戶軍移鎮鄂而易鄂西萬戶軍更戍於揚奏已准白  
於鄂省丞相阿里海牙使者相望訖不肯發軍淮省丞相念  
非公不能辦即乘驛宣 上旨語竟鄂相色赤反目公  
前曰丞相何怒受 上旨怒且不敢丞相惧荅曰吾  
怒阿荅海公復前曰 上旨非淮相所造公怒殆怒上

願亟歸相益惧具酒食謝悔乃發軍丞相奇之錄其勞  
以通國語專奏對歲率乘驛六七返 世祖見而喜曰  
是黑髯使者復來矣至元二十二年授承事郎調金壇  
縣長省執政官計慮江浙事繁夥非條達敷對莫能稱  
上意時征日本事不便念所使有詰難必忤旨遂選公  
驛馳而奏 上即罷兵遷承直郎行省理問官省中事  
急速必命公詣御前皆得允旨以歸 世祖曰伯行昔  
朕以黑髯使臣目之今察其相貌誠溫暖潔正俾以重  
任宜無負相桑哥方柄政寢命不下即再守舊職丞相  
移省江西征獠寇奏公自輔授奉議大夫行省都鎮撫



二十九年授慶元路治中慶元多故宋公相家時翰林  
學士王公應麟閉門不納客公首尊禮開說俾學者師  
事之里胥躡蹠士族著片紙叱名立名庭下公責吏數  
罪俾書故官吏復聚謀行權酷法壞富室釀具當益官  
利三倍公毀其牘不行州民某氏某以事道江淮間傳  
王旨起大家十餘姓徙置淮南傲睨指畫莫敢忤郡貳  
南士也益張大翕霍公察其奸利曰民籍始之上計此  
非淮南分地冒得徙願上省白事卒止之承接聲影纍  
纍蚩氓爭願出其門下會偽造印牒事敗大興路獲得  
其所署偽籍下郡逮捕公時再為理問羣氓造庭叩首

伏罪公憫緩其事卒得賞大德元年遷浙東海右道肅  
政廉訪副使復分治慶元縣有廢湖總戎官久據湮為  
田將輸官租以絕口公立決以溉民田撫循瘡痍磨刮  
驕冗皆素所習知而獨於鄉校諄切訓諭謂為宣化所  
宜急至今蓋有賴焉同分治官斲弛日弄事爭上謁出  
入無禁公手疏力按之太傅丞相答刺罕公審察賢士  
擢工部侍郎日從丞相騎具言江南弊事數百條丞相  
首肯之且命治西京賈人積逋鉅萬得其實大德八年  
成宗召對賜侍宴襲衣十一年成宗崩丞相受遺鎮遏  
嚴整獨命公掌諸庫藏鍵鑰惟謹諸王會朝頒賚有等



目公品節纖粟毋敢譁丞相益器之遂陞尚書至大元年今上皇帝時為皇太子以本部官見問今何階官再拜謝不敢遂加正議大夫俾稱其職值營繕推佛寺恩賞悉謝不受從皇太子如五臺山頓述如法而不病於民賜白金名馬以寵之太夫人喪暮年乞歸里特賜上尊俾祭於墓仍疾趣還朝以視事省更尚書授西浙都轉運使力丐辭再授資善大夫資國院使復辭不允三年奉旨過江南具條所行事宜即得疾卧寓舍四年三月己卯薨年六十有一公平居簡默絕聲色謙抑自悶遇事有發一即不可犯崇善斥惡若飢渴歲冠深

衣于庭廡曲盡恩意所至率招師訓諸子御史之教實有自來晚自號德齋延祐四年特贈資政大夫江浙等處行中書省左丞上護軍順義郡公諡貞惠娶曲律氏嚴整內治一不累公故所居官益自裕今封順義郡夫人男四長即御史次貌罕真習儒業以門功讓其季曰教化今為武畧將軍同知沔陽府事女一適衡山奴江西廉訪司僉事孫男聖童銅臺清涼山孫女二長適太傅鐵哥孫伯顏舍人次適駙馬丞相亦都護朶兒赤長子南無釋迦以是年八月甲申葬公魏縣乃為銘銘曰伊涼之西沉鷲悍剛挽強策良樂其騰驤天祚



神聖授兵龍荒湊輯部族以先顏行赴、赴功星流電  
驅顯允宿州飛矢執爰裹瘡先登環甲以趨履彼樂土  
藉魏莫居篤生尚書積學以蘊力探其本游於鄉校不  
伎不忿展武誓身江沅混、踣襄擣樊舟濟合看計其  
功多司譯省中敷奏簡亮走驛歲終黑髯長身儀動帝  
瞳罷征除徭音詞鴻鐘靡忒其行弗矜以辭彼權抑之  
訖莫疵之再官游歲究覈謾欺輕疑除蔓納於春熙丞  
相受命捕獠江西辟公佐戎解甲受降彼強先覆轅于  
油幢摩之沃之革其愚狂佐政海壖恤鰥廣賑尊而儒  
先俾職具訓曰惟此土衣冠振、勿為隳辱養其復淳

儒彥在堂父老在廡壽母委蛇介彼春醕歲亦有康絜  
而杭稔去馬駢、執轡如雨公復有來爭任爭扶悅其  
條教激頑蘇枯同列冒慝書章刻鋤端揆審官俾執事  
樞不譁以嚴不激以正庀工斯程賞至偃命品秩日崇  
經困陳政膏竭木萎水涸魚病積憂載馳疲閔我身計  
其便宜咋舌莫陳教子惟忠以報國恩不夸其羸淑施  
後人魏縣之原松柏堅貞錫命孔熇哀對以承倬彼光  
大維公之成勒銘表阡永垂厥慶

資政大夫紹慶瓌州南平沿邊宣慰使播州安  
撫使侍衛親軍都指揮使上護軍追贈推忠效



順功臣銀青榮祿大夫平章政事柱國封播國  
公謚忠宣楊公神道碑銘

世祖聖德神功文武皇帝奉辭興師於宋厥相賈某黷  
懷違信誓郡將悉解體不用命播州安撫使楊惠敏公  
邦憲襲土守邊至今十八世矣誓於衆曰喻合感隘荆  
州喘不保宋主且已降吾州遠王化聞大國有聖人當  
署款奉籍俾若耆稚完聚果後降汙鋒鏑吾寧忍哉  
衆稽首一口曰公言是無緩於是瀝誠挈州願上職方  
氏世祖大悅即璽書慰諭曰宋內附邊臣莫敢後播  
未奉命宜詔諭汝能承朕意其悉如宋制授官至元二

十二年公薨是生公諱漢英字熙載年甫五齡母夫人  
田氏携朝於上京眉目刻削儀矩習如成人上摩其  
頂熟視之諭宰臣曰楊氏子孤弱可憐母子遠來宜悉  
以父爵錫襲之賜名賽目不花公之為仕也授金虎符  
龍虎衛上將軍紹慶珍州南平寺處沿邊宣慰使行播  
州軍民安撫使加管軍萬戶復拜侍衛親軍都指揮使  
進資德大夫勲上護軍其治邊也改南詔驛道罷順元  
宣慰司升安撫司為宣撫司分定雲地以東隸播以西  
隸新部減郡縣之冗負者若干屯丁之糧三去其一焉  
黃平素屬播宣慰使幹羅思誘諸酋長詐以為新闢境



獻於朝公發其奸而歸我使耻不勝誣言奮有雄威忠  
勝軍思播匿不以告當籍之交州公言納土時已隸籍  
別戶臺審覈如公言使益不得志詣樞密府白其事竟  
遣使者乘急傳將械公丞相與昔審覈官言無是事而  
幹羅思卒以擅掠邊民獄具罷歸部蠻桑柘亂省議用  
兵公言賊勢方盛宜招諭之兵久無功而卒以公議相  
繼請降天兵討南詔道由播大發卒輦運以濟軍食隆  
濟賊日熾合鄂蜀二省重臣統師出征檄公以民兵從  
甫出師卒與賊遇公力急戰大軍繼之降阿苴拔乍籠  
賊復合拒迄縛隆濟阿女以歸大德四年南蠻盧奔掠

劫大姓依險翳自固黎魯在新部者亦嘯劫蟻聚攻守  
議未決卒命公撫諭二賊請命遂置戍兵以歸六年  
詔出師復征蠻命公與田茂忠率二州民兵專討之茂  
忠以討它寇未至公獨分兵五道以進賊始却却蠻爭  
合從公度深入絕後應乃全師還次黃平七年茂忠始  
來議分民兵守險而公以疾薨於師年止四十公之治  
郡殺妖民王忠以絕茅蘗大脩頽宮招蜀之名士教厲  
以化夷俗至元二十七年詔郡縣上計播隣壤不奉命  
公即括戶口租稅藉以進上大噐之入朝京師弓矢  
鞍幣之賜不絕以平南功特賜玉帶兩被璽書俾世



守其土預 御宴輒與國戚相齒 世祖嘗曰此兒聰  
解殆得天賦 仁宗則曰此子貌沉厚類畏吾人復賜  
譯經佛圖像以寵之二相貞憲王忠獻王尤加器敬性  
純孝睦宗黨二兄歿道中請於朝而襲其爵寬厚重然  
諾嘗約以善馬贈士友、死趣贈之南北冠蓋相依者  
無虛歲少讀濂雒書為詩文以體要為主所著書有明  
哲要覽九十卷桃溪內外集六十二卷幼嗜山川九州  
雄勝悉窮力以遊別自號為中齋子男四嘉貞嘉謨嘉  
祐嘉禧娶田氏榮祿大夫義敏公謹賢之女喜書史善  
筆札封遵義郡夫人公薨之歲秋七月葬於桃溪祖域

之東 祖价宋任閣門宣贊舍人雄威軍都統贈威武  
寧武忠正軍節度使賜廟忠顯封威靈英烈侯妣田氏  
封齊安和政安康郡夫人贈永寧郡夫人祖文宋任和  
州防禦使播州沿邊安撫使 國朝贈榮祿大夫同知  
樞密院事柱國封播國公謚崇德妣田氏封播國夫人  
謚章靖父即惠敏公宋任左金吾衛上將軍安遠軍承  
宣使播州沿邊安撫使 國朝授龍虎衛上將軍侍衛親  
軍都指揮使紹慶瓊州南平沿邊宣慰使播州安撫使累  
任推忠效順功臣銀青光祿大夫平章政事柱國封播  
國公妣田氏封播國夫人謚貞順至治二年秋八月嘉



貞來朝見天子於大明殿拜跪興即錫名曰延礼卜花  
礼晏如故事貞昧死言曰先臣歿有年卹典未獲敢以  
請詔下翰林礼部太常趣議追錫乃贈推忠效順功臣  
銀青榮祿大夫平章政事柱国封播國公謚忠宣田氏  
亦封播國太夫人而以忠宣所受官襲其子嘉貞為資  
德大夫紹慶瓊州南平等處沿邊宣慰使行播州軍民  
宣撫使播州等處管軍萬戶侍衛親軍都指揮使上護  
軍嘉貞踵門言曰子職在太史植德彰善宜以傳信先  
公隧碑未立願有述補謝不得辭而為銘曰播唐内  
州鮮于啓兵憬彼西夷蹂躪弗庭虎欲泐谷川震騰

軋符鼎移五季嗣興維茲楊氏太師肇初徃理其疆以  
黜以鋤相繼象賢執武靈驅奕葉昭宣臣宋奉圖中令  
之支踵德趾媿再世死忠守節彌厲枕戈復讎斬首以  
謝燁一展功贄貢不替宋社踰南間道以前是生忠顯  
環甲開先三帥締歡痛不有年立廟錫封歲時牲牲由  
太師以降十有四傳崇德效竒拯民脫危貽於後昆惠  
敏攸祗寔天有命我弗敢違委心效順世祖色怡審  
彼逆順朕不汝疵恭承赫奕恪事四帝弱齡奏言曾  
臆默計宵征邁塗毅敵鍛礪或諭以生或矢以誓提障  
一方不泯世勲盛德法如山出雲壽晉爵穹奚憾之



云揭碑隧門萬子孫紹聞

漳州路同知朝列大夫贈汴梁路同知騎都尉  
開封郡伯馬公神道碑銘

鳳翔府兵馬提判公諱昔里吉思以忠節死難廟食於  
治所汴為金南遷都作褒忠廟悉合享死事之臣兵馬  
公預焉兵馬贈恒州刺史鎮國上將軍夫人王氏太尉  
明德公女方公提孤兵守空壘力抗不敵盡室投巨燄  
一媪抱嬰兒以逝是為禮部尚書諱月合幼歲悲憤感  
厲其先居天山因以兵馬官為馬氏植德秉志贖士人  
之為奴者後皆為達官而子孫更業儒業卒致光顯焉

禮部子諱世昌為尚書省左右司郎中傾貲粟結雋彥  
家日困落子孫益用儒自振是生漳州諱潤字仲澤父  
即以文墨入官初署荆湖道宣慰司令史遷吉州路經  
歷陞兩淮轉運司經歷改太平路當塗縣長官再調常  
州路武進縣長官進奉訓大夫知光州改漳州路同知  
皇慶二年卒於漳州實十一月某日年五十有九其佐  
荆湖調漕舟討夔府山壁夾江峻轟樛木葛藟率藏敵  
者以衝突公上計帥府焚伐蔽翳取木藟結陶索挽舟  
啣尾以進漕事乃不缺在吉州治豪民絕其柄持郡守  
以刻急自任公以寬輔之郡事不撓有劫盜獄株連百



餘戶閱牘讞論止坐十餘人守終不能以奪也為轉運  
幕商人爭後先歲終鹽直不售公請刻籌第甲乙寔巨  
筭俾商人自揅以抽鹽卒以辦縣當塗上疏言括馬料  
民徙戶增賦為不便時柄臣桑哥力主議公獨以邑宰  
能奮言之其治武進如當塗刑其無良者而貸假之觴  
詠簡遠皆相慕以化有拾松薪易酒滓尉以盜論公慰  
釋之守光州取官粟之羨者廣弟子員以食光久為用  
武地司馬丞相生於光公歲率諸生以祠民始知為儒  
以自重會有言利者請籍光閒田歲可得粟十萬石河  
南省下其事公執筆不肯署吏固請公曰官可免筆不

可署卒不行州無茶租民間採山谷微末以食轉運司  
掩捕抵法會奉使出諸道問疾苦公疏所以轉運生事  
者各降官三資漳州負海障崖龍岩漳浦數反易公命  
吏宣布上意始受令漸寧謚會有言漳州地產水精卒  
以獻言者代公始罷當塗時居儀真幾十年母夫人張  
氏語家世官簿徵警之乃復任所為詩曰樵隱集若干  
卷觀其命名足以知志意矣韋布踵門降席倒屣傾家  
治具輟所得俸高下賢否以奉而其教子畧刻不肯置  
以門功讓其弟礼長子祖常皇慶初楠得交於京師其  
為文詞深湛有師法嘗默器而期之科舉行祖常試汴



梁南省皆第一於廷對以尊國氏族為第二祖義鄉貢  
進士祖烈江浙行省宣使祖孝與祖常同登進士第  
將仕郎陳州判官祖信國子生試中承事郎同知冀寧  
路保德州事女二長適金雲次適劉某孫男五人武子  
以公蔭授將仕郎監常州路宜興州稅文子猷子懿子  
惠子女孫五祖常官翰林應奉時請於朝贈尚書為正  
議大夫治書侍御史謚忠懿夫人白氏追封梁郡夫人  
公亦贈朝列大夫同知汴梁路總管府事騎都尉開封  
郡伯夫人楊氏追封開封郡君於是即中之夫人張氏  
年八十有四矣祖常今為翰林待制承直郎兼國史院

編修官願以其封婦者回授於張夫人噫盛矣哉某年  
某月某甲子將葬公於光州西樊原楠辱為文字交知  
且深乃來請銘曰節以起宗儒以紹傳誰其任之  
宗伯維先再世是承漳州象賢佐政慈寬智名不居養  
其熙光發於詩書尊聞厲行飭躬日劬載籍之蘊心聲  
為言仰止不愆茲為德源積小以高本元雲興崇  
山百穀穎粟監觀厥初豐報匪嗇揭其德華昭銘以述

武畧將軍裕州知州李公神道碑銘

太祖皇帝畧定函夏以河南北要害為分地徵科供索  
從守令取其版籍缺落富瘠莫能考至憲宗用兵西



南調發煩重推擇宜民人者為尤難時則有若故武畧  
李侯推解勸勵鄉人德之死逾數十年仁聲善政歷  
在口耳在昔考循吏由身後始定今於是見之侯諱英  
字彥臣滑州白馬縣人弱冠襲叔父宥爵以宣武將軍  
知滑州立條教悖孝讓會歲飢賦入莫能輸率其州民  
見世祖於汴啓曰兵興值飢民即逃亡將使此州為  
空城敢昧死請世祖動色從其啓中統元年蝗食桑  
蚕賦病民獨建言約秋熟並取果逋負當以身任後至  
秋悉如約以入滑隸大名遠三百里糧餉轉輓不便侯  
請儲本州候遠近朝廷是其請方兵興時鎧甲糧餼

率從豪民稱貸子母轉息旬月相倍豪民倚州督取復  
入見于上言不可陳對感切下其議執政執政咸是  
之由是官償其本去其倍息別為內府籍以誌本始行  
田諮詢旌別勤惰如是治滑者三十年至元二年改順  
德路判官尹清豐南官兩縣二十一年授武畧將軍知  
裕州二十五年改知房州所至以治滑為準而滑以久  
任其事益彰灼可考不妄嘗言叔父撫我良厚今得以  
宦業自拔即歸其爵兄子儀觀修整酬酌庶務靜要而  
理得才不盡用多士惜之三十二年十月六日卒年六  
十有九娶郭氏先一年卒時年七十學浮屠法慈儉



有度靡密總核允宜其家夫人有助焉是歲合葬於白  
馬縣大吳村曾祖義祖信父祐二子長元德奉政大夫  
龍陽州知州次元忠朝列大夫慶元路治中女四適和  
義郭君寶馮德臨魏仁元德娶張氏子二熹熹一蚤世  
女一適郭從道元忠娶孫氏子二熙杰女一適郭守中  
始元德以給事東宮授贛州判官元忠佐御史府授  
新淦州同知公及見之戒曰壯歲長民宜清謹自重我  
昔罹兵艱赤手立職業若等展世勿棄暴則先德永有  
紹我語弗可忘也今二子所至植立滑州之效於是乎  
見之楠待罪太史預修累朝諸名臣列傳是則滑州行

事宜有紀謁告歸里元忠以事狀請銘曰粵若生  
民大君長之幅員茫一牧守是資飢匪設糜疾匪命醫  
承化觀風察其阨疢展也李侯百罹是逢誅管援溺不  
希其功天聽匪高矢言率從不苛以夸不阿以容社有  
美榆田有嘉穀輿言無浮惟侯斯祝侯云逝矣厥績謨  
謨種德孔深豐報有僕白馬之原松柏茂鮮詢彼耄倪  
遺愛是言家教允遵罔有虧愆爰表銘詩孫曾永傳

奉政大夫同知東昌路總管府事蔡公神道碑

銘

延祐年紀丙辰 仁宗皇帝推恩羣臣考視品秩榮其



祖禰及其曾大父由是單父蔡侯衍以僉事廉訪贈府君諱良輔汝弼甫奉政大夫同知東昌路總管府事驍騎尉單父縣子妣李氏單父縣君恭定元年新天子下詔大賚內外俾就所居官皆錫命蔡侯時為慶元路總管又贈嘉議大夫路總管上輕車都尉侯妣氏夫人楠謁告歸里侯以郡侯事狀來請銘溯厥原自則由侯之祖父總轄府君諱旺始總轄嘗語於單父君曰吾遠祖世居徐州樹善不懈吾祿弗及食汝必有後果興汝其與榮焉單父亦嘗語於侯曰汝祖訓語猶在耳若兄弟仕進皆祖德啓佑總轄當金

南遷時限河南為內界禁不得渡河歲大飢民爭就食河北潛戒舟夜渡所全活不可絕金逾迫河南亦轉徙皆竊據自保郡人丁統領集衆萬人為宋前導總轄往依之署以部伍徐說曰宋師入汴兵弱不可用彼將無固志難與共事統領從其策歸兵為農而宋將卒敗屄以遁所居曹州鄉曰東村有孟氏善居貨自厚總轄辟難因家焉後與孟相雄長而卒以米帛賙其閭里之貧細歲鬻鹽增滲淤筭以售市悉便之至元十九年八月卒年八十有三集其姻黨與素往來者叙遺言端坐以逝夫人孫氏閱十有二日相繼卒治葬東村濶板塋舊



所乘馬負衣冠以從至塋悲鳴躑躅即死讀其事狀則  
單父之追命候兄弟撫仕之效寔總君啓之單父天天  
性明朗其所待接與其父率相類官雖卑一毫不以病  
民益宜之家僮久役服者毀其約俾自便僮不忍去  
願服田以終老年八十一得與束帛令以卒時在天  
德十年九月某日夫人李氏權某州之女俱祔於總轄  
塋所衍以臺察官入仕其行事正不近名去裏黜妖愷  
悌以耳於民而寬厚有度迪祖父遺訓復以燾後興蓋  
未可測也季曰衡大夫趙州尹女適汶上李孫  
五冲霄敏學山任某孫女三適石定安石公安孟欽

曾孫一竒山楠嘗謂為善無不報根固膏沃彌積以興  
責成旦暮考其所為不能以遠久宜矣若蔡氏祖父是  
誠可紀銘曰水塞於山積流必東磅礴委順不希其  
逢有截之椿鬱分輪困秀儀長身襲和服醇匪高其門  
厥慶日增如茨之茂如木之升父緝子承既壽且康詔  
爾諸孫以受簡穰厚德匪浮是庸紀錄表於隧門以闡  
以續



清容居士集卷第二十七

神道碑銘

朝列大夫同僉太常禮儀院事白公神道碑銘  
白於太原為令族至金源氏興太原衣冠為最盛而白  
氏兄弟相繼踵儒科故中大夫樞密院判官兼右司郎  
中輕車都尉南陽郡伯諱華字文舉其季也唐宋樞密  
無判官金天興帝賞器之特置職以罷由是相仍自郡  
伯後居真定生子四人俱有時名君諱恪字敬甫少警  
敏三歲善作字書八卦八字有以見於鄉先生元公好  
問公作詩深器之郡守上其能將薦于朝郡伯謝弗許



稍長里之先進張先生耀卿愛其才獎拔力成就至元  
中世祖遣使詣州郡試明經生君首預選弱冠試吏  
探奸拔冤獄具御史不能撓後為河南按察司書吏有  
尉卒利孀婦財未終喪強贅於姑家既而虐其婦復不  
禮其姑告於官絕之尉卒隱其罪屢訴終喪無明文  
事久不決君悉疏所犯聚邑人以告婦得終養其姑焉  
至元十四年江南建行臺御史大夫相威公慎簡所屬  
署君為掾史即條不便事凡二十大夫見世祖力陳  
之允十有八最著令者大辟成讞上刑部聽報可賈某  
公田租歲減什二十八年授從仕江東建康道提刑

按察司經歷改荆湖占城寺處行省都事時荆湖省臣  
某括財恣威福君度不可與共事辭不拜後果受誅二  
十四年改浙江提刑按察司經歷遷平江丁母羅夫人  
憂以夫人喪葬於吳將終老焉會詔舉不附權臣自  
晦者有以君辭荆湖事薦於上除福建宣慰司經歷  
閩郡廣遠豐歉不同是歲汀州穀善收成兵所給糧不  
登教福泉興化穀驟涌有司議移三郡穀於汀君建言  
道塗轉輸大無益發貴粟以賑三郡歸直于汀可多得  
穀誠兩便有司難之君置記曰使有罪願已獨受卒如  
其議而官之贏糧果增倍宣慰司復為省君治六曹文



續以俟平章某公知君薄領有能名受其籍以付吏三十一年丞相太傅公為湖廣平章君時為都事俾陳樞密及本省利便侍丞相入覲有旨允其奏復陞負外郎湖廣聯絡左右江官吏秋祿歲一再受俸於省地遠得不償旅食有棄俸不願受者君建議隨所部以給迄今行之衡永戍兵耕閒田官出牛輸其租牛死不得落籍戍兵歲率錘數十萬以酬君惻然計之曰牛死當納皮角於官除故籍而以官租捐納之則得矣戍兵由是免害有省臣獻廣西地肥沃可為田徙湖南居民往耕之當調戶五千君力言不可平章公是其議奏止之獻田

者復調兵征思明發運粟入賊境道遠雨淖荷擔者各持去志君憂有它變出直募民、樂受以往峽州歲飢請粟於官有欲核驗始發君言飢民朝不及夕使核驗死當過半矣大德二年進本省理問官推誠燭幽莫有滯濫而言論風采彬彬、文雅蓋以吏治濟其儒行者與四年改江西省理問官寃偽楮獄得直於時翰林承旨閻公復持士論賢否有言曰白文舉父子兄弟俱有文名敬甫幼負俊聲老不入翰林咎將誰執奏為翰林侍制復同簽太常禮儀院事儀度間整贊導禋祀動不踰矩蒼顏玉立真善為頌者也楠向為翰林應奉幸得侍



同朝聆議論接顏色寬厚平寔言金諸老行事歷指  
掌晚自號竹梧其為文不事雕飾扶掖後進侃侃自持  
知其於孝友有加也生丙午歲十有三月至大二年已  
酉四月卒於官年六十有三積階至朝列大夫有詩文  
若干卷藏于家某年某日葬於真定路真定縣之  
朱洛村曾祖仲溫隱德里居妣李氏祖宗完金故贈朝  
列大夫輕車都尉南陽郡伯祖妣李氏妣張氏羅氏君  
羅出也娶盧氏中書架閣管勾順之女翰林承旨摯之  
女弟男五淵安福州儒學教授沅蘄州路蒙古教授皆  
早世湛今承事郎浙東道宣慰司都元帥府都事洙國

子學正灝江西湖東道憲司書吏先卒女三長適李棠  
靜江路稅課領提次適甄遂良季適李權河間路某州  
樂壽縣尹孫男八貞采暹辟楸樞桂孫女四曾孫男  
一女三湛為元帥府都事楠適請告歸里以事狀拜且  
言先君子嘗得與子同院銘莫如子楠謝不敢辭乃為  
之銘曰 有完者圭籍之以為不泄其溫裡祀用祇受  
中以生剛柔是宜 神則仁其用不陂顯允太常幼敏  
且岐挹其粹精飭躬以教黜明養潛爰燭奸暴匪伊求  
之我曷望報道在一源摯以簡要唇、炎、益飾其巧  
佩玉舒徐六轡濡如執簡以陳矢言不迂彼計功者承



色善趨較以虧成卒喪其軀有高維閔茲為守儒恒山之陽松柏茂直詔於雲仍是謹是則膺仕之初墮麓踵奕詢彼故老曰惟祖德我銘孔昭庸告爾無斁

贈翰林學士嘉議大夫馬公神道碑銘

浙東道宣慰使都元帥馬公踵門以告曰惟我先公隧道碑未立子職在太史勲奮死事貞逸之士嘗焯一紀著登載金匱先公仕雖不顯其見知於世祖受學於碩師河內後進猶能誦習遺事敢以行實告它日上其事史館則子寔前史官庶幾傳信可永久敢再拜以請謹按公諱克實字士輝覃懷河內人父庭大父某世皇

朝入中原畧地定圖貢詔大帥專除授嘗得署郡縣副貳兵亂大父以上名諱弗可攷公八歲遭大喪後母完顏氏携載以從其夫李侯長萬夫隨征六盤善謀畫裨贊李益取自助六盤為高昌要衝高昌之俗收經史立校官地與西域接故其聲音文字詳於諸國公得其說而習焉世祖皇帝大一寰宇命以其國語別立文字用於印章宣勅其字母與西域相近公旁曲通暢單出雜比會其指歸學者爭詣門請業許文正公薦於上以儒服入見于柳林委曲問時事悉以國語對上大

喜錫以錦帽語翰林學士承旨某公左丞相耶律公宜



以為稠人師遂僅授將仕郎懷孟路蒙古教授再授承  
事郎襄陽路均州判官然不樂仕進嘗曰我能知樹藝  
遂力治其間田因原隍以種所宜木春華秋實茂鬱滿  
道過者咸曰此馬公手植也縣西有田二十餘頃皆先  
世業歲久勢家悉占其肥沃後服公純德始願歸其田  
卒酬直以受方許文正公講授鄉里時靳許可游其門  
者察以歲月始命執子弟禮獨見公篤厚溫謹即俾就  
列授性理大義以躬行為先公能守之故其退讓無干  
進之念而恂一里開克修克儉皆師訓也文正公侍  
帝所無虛日懷孟素產地黃可釀酒其修治貴精謹

上問文正卿弟子孰為誠實即以公對公素知製法得  
山中石泉如法釀以進許公之薦將由是俾嚮用而事  
若不偶公復不以為介豈安於命分者與後有奏為河  
渠使者又將奏為蒙古院學士皆力謝不受里中有德  
大師金內族年過百齡能知人壽夭前後俱尊異之公  
甫一日德夢其故友宋讓曰吾今為馬家子矣後抱示  
之摩頂即為笑容噫死生事不可詰若前史所載又有  
若似焉者寧勿書卒於至元二十九年四月六日年六  
十葬於河內縣青平村先塋之次娶劉氏征西萬戶某  
之後公四年卒生二子長鑄即元帥公次鎔朝列大夫



廣西海北道肅政廉訪副使次娶李氏生二子銳奉議  
大夫廣州路治中次錮皆早世女五人適陳吉甫張漢  
卿王某朱仲楊某鑄男四長德潛內監尚衣次德源德  
淳皆國子生德淳今為鑄後德淵府學生女四適太祝  
王世昌戴彥實李起宗郭成可銳男二德潤德溫曾孫  
一孟孫至大三年鑄為禮部郎中推恩得贈翰林學士  
嘉議大夫上輕車都尉扶風郡侯謚莊惠劉氏贈扶風  
郡太夫人李氏封扶風郡夫人鑄官中奉大夫浙東道  
宣慰使都元帥又贈公某官劉氏贈某夫人大父贈某  
官大母完顏氏贈某夫人楠於是言曰仕嘗患弗及

其身歿而子榮推其榮以及其先而為善之效著矣世  
固有極其顯光歿無德以傳卒至於子孫流播可勝道  
哉元帥公中外別歷清白益著今帥浙東事不苟求而  
明燭幽隱不為己甚遺其後者猶先公之志是宜銘詩  
以昭來世銘曰相彼土田或隄或陵深根平培菊焉  
以升實者缶之茹者釜之梓漆是供絲枲是輔種不亟  
求曰惟歲年視彼種德亦云其然溫、馬公植善無倦  
仕匪蹇時從我之願經緯聲音服習訓則奉盈彌謙以  
退以默詔爾孫曾戰兢是承蔽芾長松勿替厥聲

翰林學士承旨榮祿大夫遙授平章政事贈光



祿大夫大司徒上柱國永國公謚文康閻公神  
道碑銘

世祖皇帝應期握圖肇函諸夏文經武緯各當其職粵  
惟東平地接鄒魯時則有嚴忠武公披荆翦蕪扶植儒  
學作成撻掖卒能敷文 帝廷風動八表郢之得人號  
稱至盛而閻徐李孟世名以四傑焉自至元至於大德  
更進迭用誥令典冊則皆閻公所獨擅公諱復字子靜  
幼入東平府學蜚聲炳著操筆綴詞賦音節和暢融液  
事理率占為舉首幼從贈翰林學士康公康大器之太  
常徐公道隆年長有聞譽不敢以後進待公在翰林最

久贊書積凡高下輕重擬議精切傳誦以為楷則其待  
寮案擇敏秀者自近不滿意者不復強以文墨任滿不  
調雖請托亦不得以叙遷故事表牋自待制而下分撰  
公命各為一通輯其精良融為一家而別擬以示其屬  
始仕東平行臺書記御史臺掾至元八年入翰林為應  
奉文字進修撰十六年陞翰林直學士十九年 侍講  
明年兼集賢侍講學士於時兩院皆領會同館由是自  
應奉至侍講皆兼會同二十三年陞翰林學士改集賢  
學士大德元年復除翰林學士四年拜翰林學士承旨  
而知制誥修國史皆視其職以進其補外職則僉河北



河南道提刑按察司事浙西道肅政廉訪使 世祖陟  
方召公草詔於上都 成宗繼崩復召公上都 武宗  
即位首上疏曰惜名器明賞罰擇人材朝論躓之賜金  
錦白金以彰其直願公老矣願致事以歸乃進階榮祿  
大夫遙授平章政事給半俸以佚其老且命婚李嗣宗  
特授承直郎同知高唐州以侍養 仁宗在東宮時知  
公歸特遣使賜幣命公卿設祖帳於都門外桶嘗以院  
屬侍公入議事堂鵠峙山立中外各改容以奉語簡意  
足不屑一持辨爭丞相而下皆傾動一日草詔書其語  
意難以入國語大臣疑之有集賢學士亦出微語公召

掾史具紙筆請學士改撰學士大愧却立會食畢公改  
為之而前詔一字不復用一坐大驚公以文墨自任不  
肯為緊要官罷尚書省時 世祖召入便殿諭以卿為  
執政官何如公謝不能 世祖曰知讓誠美事宜勿強  
成宗擇相召公密問曰丞相缺可孰任以江浙行省左  
丞相某對益稱 上意其陳於上者大較若是定孔子  
主祀賜孔林灑掃及祀田皆所建明興國學論廟樂所  
助為多其在憲府以敦本崇化為先務當大德星變疏  
十九事皆切中弊壞 成宗賜楮錢萬以優罷公受知  
成宗為深嘗問其所師承金玉弊器錫賚有加 仁宗



初政首命名公以疾辭皇慶元年三月某日年七十有  
七薨其年五月葬於先塋之側公將薨時夢遊祠宮有  
道士迎問公年口占一詩以荅覺而言曰吾殆將逝矣  
世方倚公為重而公不復少留可慨也已其所為文號  
靜軒集內外制集若干卷將傳於世楠由泰定元年得  
告歸里越明年公之婿奉直大夫南臺監察御史李嗣  
宗以書來海濱告曰子職在太史出處大致子侍承知  
為詳隧碑未立願登其事於石以貽永遠楠踧躅莫能  
辭謹按閻氏平陽人今居高唐州曾大父衍贈嘉議大  
夫大司農卿永安郡公謚懿德妣趙氏永安郡夫人祖

和叔贈昭文館大學士資善大夫永安郡公謚昭猷妣  
武氏封永安郡夫人考文忠高唐主簿贈銀青榮祿大  
夫大司徒永國公謚惠穆妣牛氏劉氏追封永國公夫  
人娶尹氏趙氏李氏男一嗣慶以蔭授奉訓大夫廣平  
路威州知州未任以疾卒女一孫男二翁安翁壽女適  
即御史君也公既下世婦弟淮東宣慰使李處恭時為  
吏部侍郎慨然曰吾寧使閻公終無以易名遂請於  
朝得贈光祿大夫大司徒上柱國永國公謚文康其姊  
亦封永國夫人而公三世亦以令典得追贈並榮猗歆  
休哉銘曰 泰伯之曾食采於閻因邑為氏慶源洎



太原之間顯武後唐戰多著名分茅為王有孫曰象決  
科就文撫綏降邦拯其焚溺迨一裔孫實家平陽試邑  
死事和川歸藏是生惠穆占籍名郡推誠急施樂善不  
靳教子有行俾離其鄉業精行成何求不償顯允文康  
以文偉著執其牛耳莫或敢侮斟酌泰和密勿元氣英  
露喬雲萬物屬屬鎮於詞垣幾四十年矜彼不能擢才  
進賢維我世祖養茲國珍荐更三宗猶昔舊臣公歸  
白雲多士盡悼凡今日能亦公所造何以遠貽有豐其  
碑實茂聲弘播於銘詩

周瑞州神道碑銘

景定元二間賈相某隱城下盟罔宋帝理宗邀奇功外  
受強寇內括民業廷紳鉗舌奉風旨稍異議輒諷臺臣  
斥去小者歸田里大者入蠻瘴時則有豫章周公以史  
館檢閱入對曰李壇由山東來歸寔急而求我區一  
旅瞭然可見借援無功彼敗我辱招釁之道梁武在位  
四十餘年卒墮其計陛下臨御日久不宜復蹈前轍父  
全逆叛著在信史已登告於祖廟壇乞改正正是作史者  
誣枉逆全行事淮東人猶能道此亦陛下在宥之所睹  
困獸投林誠不可使縱意干紊又曰臣近睹輔郡和市  
富室田業以備軍餉良以和糴廣造楮一多則楮益賤



是誠不可不通變也今所在置司擇其上腴低直以酬  
又欲令賣田之主花佃輸租歲或荒歉田主必當割它  
租以補他租既竭歸於耕夫耕夫逃亡歸於鄉後可謂  
獲近效而忘遠慮自漢以來納粟補官歷代循用輸粟  
既微補爵亦輕不足以動豪民臣宜以為由尚書省樞  
密院吏員為出身定品格立止法則大家相胥以勸可  
以立辦粟可無糴楮可減造矣疏入相大怒言者急擊  
去而公風節言論著江表公諱應合字淳叟七歲授詩  
書通習大義年十七父如翼贈朝奉郎母胡氏贈安人  
相繼即世逮事王父友賢以卓行稱宋寧宗朝嘗旌其

問書棣華扁以賜號為棣華周氏嘗從棣華君至近郊  
望邑有火光亟返奉安人樞入祠堂袖神主以出王父  
竒之紹定四年詞賦應鄉書不中始悔曰吾安能事雕  
刻乃學春秋經結廬深密探微索幽從者益衆淳祐九  
年應試兩浙轉運司果冠諸生十年有旨試轉運司入  
別院復在首選授江陵府學教授待次歸里授生徒  
曲為講說會歲飢首率鄉黨立三事一曰貸貧民二曰  
濟疾苦三曰賑游末包公恢記曰是三者足補義社會  
之未備十三年官江陵首講孟子曰壯者以暇日脩其  
孝弟忠信此凡民也士無一日而不脩不當以壯幼論



師友言行去其偏黨據會立要學者深德之創鄉射齋  
申勵武備別立凡例以脩郡乘趙丞相葵雅知名會宣  
撫荆湖辟為元寮以志書未成辭焉公光祖帥荆湖師  
援夔路俾為屬主贊畫蜀事益急詔趣馬公援蜀馬公  
聽羣公議不決公獨贊進師乃解開慶二年馬公帥沿  
江復佐江東兼長明道書院淳公嗣人絕詢諸池陽得  
五世孫偃孫以主奉萃二程遺語若干卷后以馬公命為  
新金陵志自史館歸外補通判饒州後攝郡事決疑剖  
奸絕煩擾催督部使者爭薦之咸淳三年主管華州雲  
臺觀四年通判寧國府其治如番而補其前逋復攝郡

事大脩學宮除輸苗之不便於民復梅都官諸孫斥豪  
禁吏人不敢以犯湘帥汪公立信舊同寮奏辟通判渾  
州兼叅議官丞相審治行自諸賢交章無虛歲亦欲俾  
出門下諭意長沙毋行公不可相聞益怒會江文忠公  
在相位以國子監簿進擬亟命御史李珣褫刻德祐元  
年登極恩復官是歲賈相兵敗走維揚起守寧國江西  
以瑞缺守辟知瑞州將治兵為固圉計與帥議不合劾  
去素善訓子長天驥年六歲敏記誦宋有童子科俾習  
之年十一以能文詞舉後登上第人取以為法寰宇合  
一天驥守吉州迎以養却甘茹蔬感慨遁跡人不知太



守有父至元十七年卒年六十有八眉山程尚書公許  
嘗語曰君理義則濂溪章表似平園以溪園自號為宜  
維周氏籍會稽唐以憲銜官鎮江過州曰勅為御史中  
丞銀青光祿大夫因家江州六世孫曰師教訓生徒里  
人稱曰一經居士又三世曰昌元妣胡氏是生棣華君  
子男四長即天驥次天虎天鳳天龍女適朝奉郎經畧  
叅議官吳疇吉州教授劉明仲從仕郎潭州路湘陰令  
冷頤孫一男十二志道某官志仁志德志學志義志立  
志遠志礼志行志敏志伊志崇曾孫男十六女二四世  
孫十有八五世孫三娶王氏繼萬氏俱封安人其葬在

吉水縣同水縣臻善里鷓鴣山之原天鳳幼歲入官熟  
昔時言行罔缺軼楠備翰苑屬與之游言論傾倒身履  
目接人則曰官簿不足恃久而曰彼兩家不可輕楠投  
紱歸里強使校文天鳳以泉州推官同在院未幾楠以  
喪子歸天鳳請銘一曰 蹇、史君內剛以文察其要  
机叩於帝閣蒙耻冒功厥腥四聞我后不知惟相之云  
佐郡未幾輒劾以去真心委順不惧伊沮山鏡楚刻勤  
彼纂組謂宜掌制命則不遇教子有謨見其提符我寔  
故臣迹空以娛叔也秉文庭誥靡渝詵、者孫冠佩是  
侶宦若不偶名則罔替昭銘松阡以告良史



有元故贈中憲大夫中書吏部侍郎騎都尉陳  
留郡伯郭公神道碑銘

大德十一年楠再入翰苑郭侯郁文卿時為江浙行省  
都事獲締交焉見其受易學於侯先生得見尊公於庭  
下延祐五年文卿為中書檢校余時直集賢來往益密  
而其尊公正席危坐凡辱交與文卿者咸執弟子禮嘗  
聆其言曰吾兒幸竊祿位不敢以自喜其所行事未嘗  
不察其指要而足以垂後者亦將以示吾子若孫居吾  
語子焉始兒以吏能及格為掾都省定水縣門計功以  
便民不敢謾而官費以省晉山荐飢且疾疫親歷其

家去偽冒為善藥以治得活者三千人為宣徽都事行  
省都事勾稽奉公增餼羊若干而後役於松江者去其  
工直十有六萬石吾惧其瘠於民也民不以病是則吾  
之所深喜也於時衛府調卒萬五千至都城計其徃復  
俾俱以九月集白于省大臣大臣許之至則器甲精銳  
士馬肅給為諸省冠其餘稽工會程而不志苛刻於余  
諸孫良有望矣其在浮梁也迎余以養見其治學宮立  
鄉校廣子弟員知余後裔之必有以儒術顯者矣公之  
語於余者知其嗣必昌也公飲酒不亂道金朝遺老行  
事猶能反覆感慨鄉人尊為隱君是年八月卒於京師



得六十有六公諱天祐字祐之世居汴梁封丘縣呂村  
祖進考誠嘗職民千夫長娶林氏汴梁為金遷都兵逼  
楚處僑居大名大帥留之因以長千夫郭氏大墓數十  
兵亂蹂籍不可攷而新塚猶存三房審其為大家明矣  
延祐六年八月某日葬於先塋郁為浮梁州以大賚  
思進封奉政大夫知宜興州驍騎尉延祐七年郁受中  
順大夫知高郵府至治三年授中憲大夫同知兩浙都  
轉運鹽使司事泰定元年授亞中大夫僉江西湖東道  
肅政廉訪司事二年七月贈公中憲大夫中書吏部侍  
郎騎都尉陳留郡伯未幾郁改授慶元路總管楠嘗以

為貴顯之及於親必達于遠祖親榮矣而考其若子之  
行事是猶望于後也自侍郎之無祿亞中公四歷要官  
楠畧其治狀以侍郎之言為可證豐功茂德見於去思  
誠不在是也配李氏累贈陳留郡君公男四長亞中次  
迪嘗為錢穀官厚海道運糧萬戶府百戶仁主簿今為  
江浙行省掾郁娶孫氏封陳留郡君子三澍渥国子生  
壽早卒迪娶崔氏子三厚娶崔氏子四仁娶孫氏亞中  
來乞銘、曰 大梁之區厄為兵墟層城鬱我以難以  
鋤維郭氏先歷有譜圖迨、郭公在唐紫朱吏部有謙  
弗克以居以其先聞維訓蓄畚味道養齡擊鮮以娛治



官蒞民考於庭趨大樸弗雕盛德莫踰維公有子克遵  
令謨述銘孔昭勿替勿渝

王氏先塋碑銘

延祐四年中書左丞王公出為江浙省右丞將行天  
子遣使由上京傳旨曰毅其勿行七月拜中書省平章  
政事由是推恩如令式得贈其魯祖為正奉大夫山東  
東西道宣慰使上護軍魯郡公妣周氏魯郡夫人於是  
平章拜命惕然有言曰惟我祖蓄德闕華慶貽孫曾稚  
昧實茂克稱天子寵綏於臣子厥亦赫厚願叙先德  
以收合宗譜子職在太史為我表而銘之楠謝不得辭

謹按郡公名汜世家德州平原金將亡士族奔播南徙  
郡公有子金甫七歲隨從子走亳州稍長壻田氏由須  
城鄆城三徙後占籍汶上晚歲嘗謂子曰吾幼罹兵凶  
僅能記我考妣名字遺牒舊事不復省今祖墓在平原  
郭東北五十里曰水務鎮我死力不能歸葬若苟毋忘  
平原也今以平原累贈資德大夫江浙等處行中書省  
右丞魯國公二子長曰玉次曰傑二女嫁張氏葛氏  
玉嘗一試吏輒謝去謙約無表暴策杖鄉社通慶弔煦  
煦無憊意今年八十有四以榮祿大夫河南江北等處  
行中書省平章政事柱國魯國公致政於家始平章以



唐事歸養魯公曰 聖天子軼齒名至渥我雖耄尚善  
飯汝不效犬馬報居家何為也又附 詔使奏曰不佞  
老臣骸骨堅且強謹遣臣毅一心事陛下 上大喜特  
授集賢學士資德大夫其配郭氏朱氏封魯郡夫人後  
以推恩進郡公訖封魯公魯公子三人長平章平章子  
思恭思齊思聖思誠思明次子謙 子思禮思義幼子  
鼎 子思道思問曰傑魯公弟也子四人愿讓諒懋傑  
孫思正思進思忠思溫思益噫平原之墓由郡公得封  
今始有表焉郡公之若祖若父名字弗可考陰然兆域  
則皆在其上而諸孫之與平章同高祖者凡四房猶在  
平原居平章振興於百年之後曰郡公之追榮合譜繫  
族傳五世之本支橫列旁附將使之孝謹自將益昌其  
祖可謂厚也已銘曰 的 平原土墳宅舒民用泰寧  
聿勤佃漁自河雲奔邑屋播逋有變者離宵衣走途九  
折其行益南以趨由毫投汶靡定厥止稅於須城客鄆  
以俟復還於汶以鑄以耜望彼北河有陰坡陀企焉音  
容戰兢弗磨衡門之棲韜精養和曰我有籍我墓伊何  
戒而孫子勿忘勿祀番 魯公樂道趾徽允也魯公不  
衡以試藝而黍稷亦有魴鯉遨嬉大耄訖用壽祉篤生  
辨章為國之梁夸毗弗師佩瑤秉璋諤 蓋言百士辟



剛始事東宮岌高偃讓告疾遄歸厥聲四揚魯公在  
堂曰汝來庭囿恩靡效順其寐興汝車疾驅我餽斯寧  
鴻化惟幾靖希陰平勿忿以媚勿喜以矜帝曰汝嘉  
庸過南征乃晉平章衮衣具榮視品追秩三世是錫平  
原之瑩松柏茂植維高維曾爰勗懿德寸雲敷功下土  
霈澤嬋媽祖芬肅爾承翼合宗別支秩一母系瞻彼中  
林王氏之本匪祖冒思匪譜孰辨春秋墓門藝一在嶽  
紹聞象賢繩武以昌平章之心孝思不忘刻銘先瑩久  
載用光

邢氏先瑩碑

邢氏世居彰德安陽之交口村金亡大姓散走譜牒塚  
墓軼塞率高曾莫能考名字維邢繇酒使君始著君諱  
植字子實幼隨父母竄處林谷親疫死從兄林歸里力  
樹藝自給厚德早讓以先業奉其兄後居城中蓄善貨  
取贏頗以財自振尚義急賑兄無子訖盡力治生死每  
曰嗇用近禮愛物近仁執信守常吾何慊焉坐肆中有  
客數人質縑於肆者罷肆縑有白金遺焉追客莫及明  
日客至君先授之客曰果有遺不意在君所誠大長者  
相謝以去庚戌歲火災郡蕭侯率民携縷盡力用命不  
可減至君舍乃反風侯敬禮之始以推擇為酒使歲終



第籍上府窶戶無所納乃悉以已財補輸之書券於君者毀不問後不肯仕鄉閭化之至元二十四年三月二十有二日以壽卒於家年九十有六初娶李氏繼楊氏李生子曰德裕字裕卿風度皎峻展公所行整暢為儒吏擢本路錄事路隸某王分土俾復為酒使至元四年銓選格行授將仕郎博州路錄事遷潞州判官再遷從仕郎陽翟縣尹又遷承事郎藁城縣尹其蒞博州調征南軍不使富民委役於貧潞州有疑獄立剖之而讞陽翟獄尤著民王氏有婢竊其簪珥酒壺以逃盜不可得誑誤相連坐乃密詢其素所往來或曰王氏姪誘婢它

之度不可俱行因殺之以利財後卒獲其姪一訊輒引服縣人大驚爭持酒斃以賀在藁城會真定無極縣軍隊長匿戍卒鏹二萬五千緡詒言室中夜遇盜告於官三年不能獲捕盜官多受罪挾疑似坐獄中三十餘人府以白樞密院咸曰是能決陽翟疑獄者檄君以問入其室左右視驗寔無有盜跡呼其孥二人別居之所對皆異辭遂直入其室發牀下軍鏹咸在即日獄具而君以二十九年六月一日卒於官年六十有七初配王氏再配郭氏皆葬于交口之祖塋有子五人長曰秉仁字仁甫曰秉義某官曰秉禮某官曰秉智曰秉信女四人



皆適士族孫七人女孫七人仁甫始由憲司筮仕入掾  
臺省兩為太醫院行省都事鐵冶正副提舉一再為二  
千石治撫州興學禮士盜不敢入境治廣平亦以善理  
冤獄有能名郡民立去思碑以祝之今以嘉議大夫禮  
部尚書致仕於家而藁城君卒以尚書為提舉時推恩  
得贈朝列大夫騎都尉河間郡伯王氏郭氏皆封河間  
郡太君尚書之長子溫字孟直更迭省部由御史徧歷  
中書左司官諳習故事而克謙慎修以禮度自處今授  
亞中大夫大名路總管將之官致尚書公之命曰父子  
俱受朝廷殊遇列三品夙夜兢惕實為先德渟蓄再

世以昌悃後人徒知邢氏之盛而莫知二祖之勗善培  
本者若是願刻諸墓上因子銘以昭示於後乃銘曰  
雲雷之交經綸靡寧上降下騰甲拆是承劬儉於躬不  
企其成蓄極斯泰奕々振亨折獄探情罔用口才晉以  
裕衆茲惟艱哉維子維孫享其胚胎仰俯橋梓播美益  
培霜雨濡降永思彌虔詔而後昆潔其簋籩仕以飭身  
止以樂全過者必式茲為邢氏厚德之所

任氏先塋碑銘

青齊由尚父啓封土沃民阜擅魚鹽之利山水險阨雄  
偉冠鄰壤昔時宰輔願優逸自便者爭乞守是土滕槩



見於職方氏數千年盛矣劉豫猥父子背宋以千里赤  
子驅為兵徒犯順滅德金主悟其元惡傳旨就戮而青  
齊戶口物故過半完聚未幾李璫復懷逆抗拒齊部所  
領益莽為墟落痛矣哉任姓世著滕州傳緒益遠有元  
帥府君諱杞以宏字府君為遠祖葬於薛河源宏有七  
子擢文武科墓碑燬落今由元帥府君始可譜府君娶  
王氏二子長曰銳金武舉武士終千夫長次曰釗字某  
某幼長戈革篤考今古成敗以進取自任鬱鬱不得志  
持素所講習訓導鄉黨陳義抑惡片言總榮耻薰受以  
化咸曰繫任公所成就郡縣以其行舉於朝辟行軍總

管再舉沂州臨沂令皆謝疾不就始由沂州歸於滕築  
室祖墓一日募火燎於塋逼墓次公號泣伏墓所有頃  
火由它行郡嘗上其事府君曰吾得歸故里守丘隴奚  
外慕焉美鬚善容倜儻以隱逸自傲至元二十四年九  
月六日年八十有一卒以孫貴贈樂安郡伯娶周氏贈  
樂安郡君三子長曰榮曰滋曰英榮由元帥府知事陞  
閩海道提刑按察司經歷以不樂入嶺嶠改授廬州嘉  
興總管府知事善心計仕泊如也以子貴贈某官樂安  
郡侯娶單氏贈樂安郡君生子四長曰居敬善吏事所  
至有能名為建康般陽路總管今以通議大夫禮部尚



書致仕娶王氏樂安郡夫人尚書子擇善承務郎樞密院都事執善江南諸道行御史臺譯從事女三孫三曾孫三曾孫女一曰居禮房娶李氏七子師善中政院管庫兼善泰寧路司獄思善早世明善進善悅善從善始學仕曰居仁房居仁為鷹房總管府經歷娶王氏馬氏生志善適善達善宗善曰居義房娶丁氏生伯善性善友善合子孫與曾孫四十一人郡伯次子曰滋房娶李氏生子四居安居信居寬居合孫與女二十一人郡伯李子曰英房四子居實居慶居厚居德合子女十人嗚呼由府君至於今凡五世通其譜幾百人世莫可儷

豈非其孝感於鬼神蓄極以通故仕者振於朝而其未仕者各相勉思繩祖武以自顯匪表于墓則曷以彰盛德擇善深湛雅思見事不苟與楠同備屬翰苑厚善而尚書亦屢瞻其儀度侔有述焉奚敢辭銘曰 滕薛之間任國首封傳於東都齒秩有崇禮食是問邈其遺風泱泱三齊絲枲沃豐執智秉機厥俗攸同允也府君厄於兵難閱詳興衰訓言間々左閭右塾化其怕奸隱身墓廬以號以攀仕不强希榮恥莫干雲藏靈淵磅礴翁鬱朝躋於陵百谷瀰溢德盛莫居子孫秩々聿來墓門展祀芬苾叙昭辨穆孝謹罔失



清容居士集卷第二十七

清容居士集卷第二十八  
墓誌銘

翰林學士嘉議大夫知制誥兼修國史趙公墓誌銘 代院長作

大德七年正月辛亥翰林學士趙公悔叔卒於官其年  
十月中書右丞相入對 天子曰趙與票事 世祖皇  
帝幾二十年事 陛下亦將十年敦恪清謹今既死無  
以歸骨於里敢奏以請于是 天子命有司賻緡五千  
復給舟車傳費俾其喪歸將行孟實等以狀來請銘復  
往歲直翰林公為待制其叙遷也亦相後先知公尤詳



義不得辭方至元十四年間聞公以驛來朝深衣幅巾見世祖於上京冰澄玉瑩詞氣整朗言宋亡根本所在親切感動世祖傾屬自是入翰林為待制為直學士累遷為真學士公之為侍講也言江南箕歛急督移括大姓宋世丘壘暴露皆大臣擅易書詔明旨又言庚寅歲大霧蔽塞正月甲辰虎來西城其徵為下臣執權簸政言雖不行而公閉門待罪後司徒公俾同列諭意始復入署公每視職清望近思欲言議質直理道確近條縷報上故所言嘗若愷切無隱而世祖皇帝沉幾先物神量莫測或為公懼至平章政事不灰木公為公

奏私負歲積皇帝曰得非指故臣為虎者宜官酌其逋別給廩粟布帛以養由是始知君臣相與脗合明著如是曾祖伯洙宋朝議大夫知南外宗正事祖師雍宋朝議大夫直寶章閣考希聖宋宣教郎史館校勘高祖宗正某南遷時丞台州員岩因家焉伯祖師淵與朱文公纂次通鑑綱目凡例微言奧語耳受身履故公所行尤近嘗與許公仲平論伊洛閩域首言力行致知清簡唯高沉嘿自秘皆東南極弊文以顯道舍是無以議許公深然之至觀公待人愛士恩禮周洽不為疏數翕訛其持家簡泊無復商權計慮非深知道者不能也天性孝



友自宗正而下四世力請於朝而復其役贖姻黨男女  
為奴而不能歸者凡十有一人始登宋辛未進士第為  
鄂州教授由鄂來京師迄為翰林學士知制誥同修國  
史積官至嘉議大夫年六十有二其所成就不為甚過  
而公以榮祿豐遇為可愧不獲老田里為可恨噫公之  
心如是而已矣初娶夫人舒氏不一歲卒歸橐中裝於  
婦翁不取今夫人史氏三男子孟實以公為侍講時特  
官為承事郎同知瑞安州事孟賚温州路蒙古學教授  
孟貫將以廕入官以某年某月某日歸葬於貢岩塔山  
之原復嘗讀文王大雅之詩曰商之孫子其麗不億上

帝既命侯于周服侯服于周天命靡常殷士膚敏裸將  
于京以知文王之德之盛商士之恪謹溫遜篤承天心  
維我世祖明德造邦式混區夏內外小大共為帝臣  
而公陟降左右承賚接錫終始若一至于不幸而死今  
天子復申命而寵綏之則公死猶無死也是宜銘之曰  
祿不歛羸謀不課利我以其拙彼以其智衣敝策駕內  
澡玉雪誦聲清冷鏗出金鐵蹇々九閔壬人殞魂維帝  
有訓四方于聞之身云亡之德不爽丘環麓茂一息以  
往繫畀之豐維時之通尚詔後人以封以崇

奉政大夫昌平處等屯田總管贈亞中大夫永



平路總管輕車都尉宣寧郡侯劉公墓誌銘

太祖皇帝沉幾整武感金踰南肇定中原物土萌蘖橫  
出迭變莫能稱上意將草芟而獸蒐之久而曰噫吾赤  
子也始料其民俾執藝丕作故家太姓爭占籍自詣遂  
得脫鋒鏑堊處以居飭材辦器咸精其能而人益效用  
國以富强猗歟盛哉故昌平屯田總管劉侯之祖仁時  
為金軍器局副使治於汴至是率其屬徙北以行副使  
之考秉文家河南世儒族讀書通大義審金將亡兩河  
大饑家故饒傾所積以食餓者或曰歲荐饑宜善蓄以  
俟府君曰國迫民流旦夕當走守穀可乎守子孫可乎

後副使由燕居宣德奉府君以養終葬於宣德為祖域  
首焉副使隨軍而北也諸匠官所領道亡過半獨副使  
整部位工作皆完繕師大人竒之曰吾當入白上擢以  
美官卒俾見 太宗皇帝授諸路人匠提舉後陞總管  
以終其配馬氏故涿郡馬令公之女孫男三人長伯英  
雲州判官季伯豪安平縣尹仲即昌平君諱伯杰字巨  
卿習土俗騎射尤善諸部語言初從其父至大興見尹  
郭汝梅郭以能理劇知名善鑒識一見即命佐麾下使  
候賓館使者鞭帽駢集指畫不可辨能悉其語意周折  
省約使各慰謝以去尹益取自近壬子春 憲宗獵瀟



州柳林尹日扈從治供頓一日上問尹近郊歲入州戶籍多寡尹愕謝莫對輒從旁具對甚習上喜顧侍臣曰是人宜為官、寧有不能會供應官忤旨受誅乃授警巡院判官郎不避署事先白所司言京師號賈區奇貨善物可立致官減其直歲盡且不與雖百置市令無益卒如所白而官取需始輯秩滿府咸曰舍劉君孰能遷本院副使再遷院使歷院四曰大興宛平易縣樂陵循撫慰煦倉卒泛索不假氣色卒不使煩擾事益以理古言京師號難治若內縣得一善滿輒蹈足以去君所為官凡七遷皆畿赤繁職使忤貴近一斤不復上驅民迎

合將促數苛擾曷得更進迭用以自顯若是則其治狀可無愧矣其治樂陵也鷹房數百人從旁縣來糗肉滿馬尾意樂陵可稱意讀令諭之召其首曰使果犯誠不貫汝卒避去推樂陵所為政其治它縣與府縣蓋可知也後為昌平路屯田總管積官至奉訓大夫卒以至元二十三年四月某日年六十有五其葬在大興縣招賢鄉烽臺村之原男六易安縣尉早世弼監太倉支納致事裕宗皇帝年勞補官積遷中大夫建康路總管府事佐承務郎同知深州事敏從事郎深州判官敬承事郎藏珍庫使女三長適幽州賀進次適承務郎尚舍監



丞蕭某次適嵩州判官曰從義孫男九可大將仕郎同  
知馬籠州事可久早世可浩崇祥縣尚印可任幼侍  
東宮進義校尉行篋司藥局副使可復可貞國子生餘  
尚幼孫女五長適安平王某次適幽州郭炫保定于杰  
幽州朱棟蔚州宋某延祐中贈典行致官三品得贈二  
代始追封亞中大夫永平路總管輕車都尉宣寧郡侯  
夫人宋氏宣寧郡夫人而祖父亦贈中順大夫宣德府  
知府驍騎尉宣寧郡伯配某氏宣寧郡君楠往與太常  
博士楊君宗瑞游過其塾見劉氏諸孫齊襟受經雍穆  
有度而建康公禮法自持未老倦遊肅然以門戶訓勉

今觀博士行述儒素之積實有由來禮不忘其本遭時  
熙明將於是乎振遂不讓而為銘曰巍巍元后成  
玄功鋌戈誕指中州從磨驚鼠竄老與童土金木石獸  
草工各飭攸職程作供徒彼儒族漸勁雄毅甲奉貢朝  
紫宮語言清琅纘耳聰指掌代對剖臆宵天府赤縣更  
選庸貴瘖擴伏氓顯游刃不缺至理通大椿靈根壤  
墳豐美蔭蔽蒂宏闕崇鏡銘堅珉德彌隆

將仕佐郎信州路儒學教授陳君墓誌銘

大德丁未余供奉翰林與廣信陳志仲游粹然以容慎  
密不妄言間語昔時祖子孫家慶故事志仲莞爾言曰



吾大父迪功君大母程夫人罹兵難時年七十餘我嚴君衛鄉保入侍二老人嬉戲盥饋奉禮如昔迪功君年愈高別築華山梅堂以奉益不復知有世事於時諸孫寔五世矣迪功君號南隱翁、終時年九十有四方南隱翁無恙時諸父皆逝唯吾老人力整門戶訓兄弟子後以儒術興者凡若干人幸為我記華山為己酉歲秩滿南歸余師剡源戴先生教授信州亦還言廣信多郡博士獨陳博士溫讓材智篤素慎行為第一方有司急庸調徵儒士幾二千人能力言而盡復其役汝官京師有名敏學字志仲者其子也與之游乎未幾志仲以信

州教授致仕命歸榮其親後為官師府司經典籍稍遷太常留錢唐遇之則又曰吾親年七十時嘗為書授敏學曰年至而仕非古也壯者必仕、不求祿養吾視大父年不敢歧幸氣血康完若二兄恂、善持家勉若以仕勿懼也皇慶癸丑余復入史館志仲則以太常舉將為博士冬十有一月訃至凡所與遊者皆入弔越三日凶服踵門泣不能言以國子博士虞集之狀授桶俾為銘君諱萬里字德甫弋陽縣人幼善屬文長從工部侍郎韓公禾學詞章起居徐侍郎公直方受理學謝公枋得張公卿弼植志節咸淳癸酉薦於鄉後起家廣信書



院大修燕居堂面帶湖立諸生論古成敗道理遺言微  
旨文質益損皆口授手畫諸生不忍去請於官留帶湖  
凡十年南隱翁卒學者咸會葬焉雅性寬厚善清言與  
人交久而彌篤歟歲疾扎蒺粟施藥以全活家多書雖  
証成善本謂諸子孫天佚吾老子遺爾書守儒為準守  
身為本餘何言哉壯歲慨然慕詞學故於章啓語尤精  
噫方宋文治時立博學宏詞科番易三洪公周文忠公  
迄致清顯至呂成公真文忠公闡正學彌貴重真傳之  
徐鳳之傳之尚書王公應麟公曰中是科者實有命晚  
歲問難無以承諸生徒自辱爾楠聞是語愧汗累日今

幸與志仲交意謂從廣信山中論竟斯道今不可得矣  
屬纊之日戒勿用浮屠事實以九月某日卒得年七十  
有六以某月某日將葬於永平鄉之吉田曾祖謙道祖  
應隆考文光即迪功君也長子誼次天驥皆為郡學官  
先娶程氏出次敏學將仕郎太常太祝今方氏出女三  
長 晟次徐某次方天祐孫男七人長師中第五孫弘  
為大都路儒學錄孫女五人曾孫女二人楠嘗謂士患  
不得名山居谷隱一時推可多任俠尚輕重若先生者  
休然養名平進安時鄉閭化之郡縣企之孫曾承之歿  
有餘德古所謂鄉先生者陳氏之門見之矣是宜為銘



銘曰 日劬其躬以濬其逢不逢樂天修齡以終帶湖  
之徒來會幽宮彼冽者泉樹之青松而子而孫慎其延  
弘式昭墓門百祀弗窮

陳士直墓誌銘

咸淳三年浙西提點刑獄戶部陳公卒大臣以公清直  
挺著特官其子嵩伯是曰貴白甫有子命名長曰紹廉  
季曰紹庭廉言清庭言直也壬午歲余過奉化入其里  
居拜戶部夫人於堂下退揖貴白甫於賓次識二子焉  
其季紺頂斑襦眉目刻成燁然碧光流几席稍長群諸  
生誦聲琅圓端嘿絕外嗜又十年貴白甫居徙江滸復

入城僑館則季已加冠字曰士直神益完貌益整肅客  
侍立無倚怠退具醪茗動中周折不復俟指顧問從士  
直坐書室鉛黃森錯卷帙整衣受業退暇琴清筆潤花  
竹手植如幢列人咸曰誠有子桷則曰是宜壽且傳噫  
世胄彫蕭夸者馳侈靡早者淪頽仆幼儀雅言耳目不  
相接垂三十年脫有能自樹植皆楚人窶子推魯不入  
繩墨獨士直以故家兒授受薰熟而貴白甫身教簡易  
故人皆愛士直靜且和足以蔚其宗余亦愛士直將挈  
而克之使益有令聞大德丁未余官禁林有言士直遵  
海東遊京師遲之不復至己酉歸里貴白泣且言曰吾



紹庭無狀以九月某日亡矣其死也遺筆叙訣無怛語  
獨屬兄置後以慰父母明年春兄果得男曰鑄配汪氏  
遂育以成其言葬地在宅西嶼山以辛亥十有二月某  
日窆俾楠銘謹按家譜曾孫祖諱某宣義郎致仕贈朝散  
郎祖諱宵孫朝奉大夫戶部郎中浙西提點刑獄嗟夫  
世患不能持身既壯且修振衣康莊御轡遠騁其進莫  
可止輪揉輓敗卒歸於命貴白甫秉德師古迄逢不淑  
莫紓其悲以貌斯稱余復失之天乎是果不可知也庸  
銘以慰而翁銘曰 有燁者珠復沉於淵云誰尸之蒼  
維天雲乘嶼山兆食歸復詔而兄子以衍以續

戴先生墓誌銘

先生諱表元字帥初一字曾伯世為慶元奉化州人七  
歲學古詩文多奇語年十三即加冠入鄉校從里師習  
詞賦輒棄不肯學諸父強之乃遊臨安於時新定方尚  
書逢辰廬陵劉博士辰翁以論策表屬進士得先生文  
大奇之咸淳己巳入太學改歲以三舍法升內舍生又  
踰年辛未試禮部第十人登進士乙科授建康府教授  
越乙亥歲由建康歸遷臨安府教授行戶部掌故皆不  
就積階至文林郎大德甲辰先生年六十一矣會執政  
薦於朝起家拜信州教授秩滿授婺州以疾辭至大庚



成三月卒享年六十有七先生在建康時先處州通守是邦朝夕互還往先生眉目炯聳慷慨自奮欲以言語筆札為己任嘗曰科舉取士弊不可復改幸得仕矣宜濯然自新斯可也後二年失仕歸剡遂俾桷事先生始盡棄聲律文字力言後宋百五十餘年理學興而文藝絕永嘉之學志非不動也<sup>勤</sup>挈之而不至其失也姜江西諸賢力肆於辭斷章近語襍然陳列體益新而變日多故言浩漫者蕩而倨極援證者廣而類排諧之詞獲絕於近世而一切直致棄瓌繩墨芬爛不可舉文不在茲其何以垂後先生深憫焉方是時禮部尚書王公應麟

天台舒公岳祥師表一代先生獨執子弟禮寸聞隻語悉囿以為文其文精深整雅蓄而始發間事摹畫而隅角不露施於人者多尤自秘重不妄許與晚歲翰林集賢以修撰博士二職薦論而先生不可復出矣維先子與先生總角相厚善暨先生登進士年盛氣邁故舊貶抑者不敢自進先生正色相輔復以不肖孤托于先生誘之迪之獲不失其身往歲解官南歸於時先子捐館踰一紀矣先生始愴然曰先公之德幸勿墜嗚呼朋友道喪久矣過時而哀桷實何敢自昔孔門首分四科歷代之士率不能兼有尊德行者後文學世嘗病焉先生



為文尤多於忠厚孝悌之語後之纂言者其必有所考  
夫文以蘄遠果能遠矣而近者五六十一年或止百餘年  
其不幸者又皆為水火燬沒亡紀使誠盡傳也則世有  
能名者不一二數然視今世焯々所傳又皆無是事噫  
傳與朽始固不論也曾祖辛妣劉氏祖汝明妣鄭氏考  
灝妣王氏世多儒科伯祖杰端平初為宗學諭篤厚為  
時輩所尊先生詩文若干卷病革猶手加繕定以所居  
鄉名曰剡源集治窻張村葬以至大元年三月某日娶  
陸氏子男四初陽次紀後庚幼儒女四壻曰陸孟孫二  
肖翁徐公說表庚孫二男女八始先生兩授徒于鄞于

宣于杭其徒散處莫會初陽等謂從學最久而知吾父  
者宜莫如楠遂俾誌其墓乃泣對不敢辭銘曰 桓々  
戴系立氏以謚信都九江集禮秉衛在漢國鈞守正忠  
毅別籍於剡貞德彌勵琅然孤桐不溜其逢浩歸衡門  
邈焉冥鴻二季重輝續其高風箋經暢隱雅言春容厥  
壤大牙旁邑曼著方門之文本茂葉附展世斯赫宗黌  
攸輔誥々餘慶聿踵先武振聲鋪華先生曼承有赫者  
光不竦不凌在泮莪冠掩耳以行曲裾長褱祗繫其享  
千途競偽一轍交走正岐前驅白首莫疚蒞其粹精如  
瘖脫口如轡在手如藥在肘屢躋於艱秉禮益閒有泉



潺：有珮珊之駕言東遊曰知者天卒昌其文以終丘  
樊張原之柏先生手植彼高為南彼鬱者北告而嗣子  
以順以則昭銘墓門過者必式

周隱君墓誌銘

先王盛時以三物教民六行之不修則設刑以糾之是  
六者切於人道之日用故嚴以為之防其理然也降于  
戰國彞倫益斁孝友著於列傳擁強賞持短長縱恣郡  
國作史者復傳其事豈誠有激於世乎納粟之令行虛  
文益張實不見於鄉黨執筆以揚人之美不偽則佞吁  
可懼也已廬陵曾君巽申與棟同在翰林狀其姻家周

隱君之行曰君諱天錫字極翁吉安路安福州人曾大  
父大成大父宗元平實自持以累舉恩授迪功郎臨江  
軍新喻縣丞父九鼎篤信行歲飢能損粟直以售遇朋  
友急厄傾貲解援裕如也年內翰領史事將薦以自近  
後不果文丞相信公靳許可扁其齋居曰信太學博士  
劉君辰翁寔銘之是生隱君嘗以詞賦上轉運所江丞  
相讀其文竒之事親盡孝侍疾治喪悉如禮以遵父志  
其待夫族姻洽于鄉里者彌有廣焉性不事表襮勸之  
仕謝曰吾求全吾初遂因以自號至元二十九年十一  
月年五十有二卒娶蕭氏男長孺將仕郎江東寺處儒



學提舉孫男三福祺禎孫女四延祐五年四月甲辰葬  
柏溪之橫原讀其狀則知夫厚德之延非一世繼志紹  
聞久而彌光泉寔於山木生於地磅礴鬱積有自來矣  
君之遠祖廣為南唐節度押衙積憲銜為御史皆金紫  
唐廣明以來有是官曾君平居語不妄孫禎曾婚也曾  
三先君監察御史縣桂陽時為湖南主文寔拔君為首  
選事可證若是銘曰 有錦綉之有玉匱之蓄兮續之  
是用穀之廬陵之原豐碑秩々昭其幽光詞不以溢

楊府君墓誌銘

江南官簿大家運統合一緒墜牒散流降不復可攷或

者謂聲聞詭激德不稱名馴致是理味其語淵乎有旨  
哉箕疇叙五福首次以壽富終之以考終命而祿位弗  
叙若是則尸祿位者私善惡喜怒鈞名挈譽幸終其身  
其禍可勝道哉至治元年余校文南宮得一士曰張純  
仁廣信人也調鄞縣丞鄞為余里會謁告歸純仁踵門  
以其舅氏之狀請銘其舅氏為武夷楊氏楊由侍讀學  
士徽之翰林學士億顯後有徙信之弋陽今為弋陽人  
其曾祖諱崧祖元龍考汝翼妣三世曰李氏程氏江氏  
考能詩有集曰醉吟李君明通叙之君名謙之字謙叔  
嘗監麻沙鎮後不復仕其所從師曰謝公君直純仁之



視教授君其事親有誣其考以重罪君總角詣庭直其  
寃其居室銖黍充叙使善裕其施於鄉損粟直以濟飢  
買田以助縣庠其宅南有重巖水石君能翫美獨樂之  
其娶熊氏閭助迄成其家子三長昭德次拱宸先卒季  
進德孫男九孫女六曾孫一其生在寶祐丙辰卒以泰  
定元年正月某日年六十有九其葬在武石山噫所謂  
五福斯備者歟其自號曰謙山名字與號若不相捨茲  
其為延永也大矣是宜銘、曰世以祿夸我弗企之  
積小以高莫或躡之哉、長松美蔭日疏迄樂其全弗  
僭弗踰武石之山固爾體魄爰廣墓門過者是式

劉隱君墓誌銘

五經之學由宋諸儒先緝續統緒詩首蘇轍成鄭樵易  
首王洙東萊呂祖謙後始定十二篇胡宏氏辨周官余  
廷椿乃漸次第有古文今文陳振孫掇拾援據確然明  
白言傳心者猶依違不敢置論至天台劉君正仲諱莊  
孫始憤然曰吾不能接響相附和尊聞紹言各為論著  
不沒其實而先儒之傳益顯所為書曰易志一十卷詩  
傳音旨補二十卷書傳上下篇二十卷周官集傳二十  
卷春秋本義二十卷其論春秋為魯史之舊是則發揚  
先儒之遺旨喜著書能以詞藻達幽隱復為論語章指



老子發微楚詞補音音釋深衣考而其所為詞文曰芳  
潤藁凡五十卷和陶詩一卷噫多矣哉學患不博矣  
其必不能有以精也士生於今會衆以合一由谷而之  
川以達於海蓋其書具在獵英聚珍朝成夕上敏而  
求之者良不以為艱是則於劉君見之君少學古文湛  
深隱伏不見其涯涘落筆數百語詩工次和愈作愈平  
順而幽愁感歎思其平昔狀其羈窘鑿燭清澈物莫有  
迺遁者性嗜酒不解治生業幼侍其父府君昇自為師  
弟子從閬風舒先生岳祥游唱和不輟空林絕嶂目接  
耳授一寓於諷咏晚歲先會稽郡公延入塾教諸甥楠

相與論經旨徃復不避鞏行蓋君篤信周官而不鄙每  
置議君亦不以為忤在太學五年不善為同輩文字不  
獲釋褐今其所為書先師尚書王公總而序之大德六  
年十二月某日卒年六十有九娶王氏後七年卒子三  
長圭一早天次存翁學翁女一適董可傳葬於土輿之  
龜峯劉子寧海儒族八世祖世充為吳越王錢氏板授  
官閬風里有二劉曰和叔曰永叔於君為曾叔祖有文  
名不大光顯至君父子亦若是今遺書具在詎果無傳  
也耶曾祖某祖某妣某氏其子存翁嘗請銘以久官翰  
林不克為至是二十有四年矣今復有請愀然謝曰隱



君振華續光將大有傳者奮漸盡桶敢不自勵銘曰  
探微振墜前哲功後學剽襲誣崑蒙偉哉卓識合異同  
輪囷卷帙浩不窮冥搜玄象歌颯、弄筆為戲箋魚虫  
辟雍三黜命莫逢紀述有在蓄極通墓門永謁昭儒風

曹士弘墓誌銘

褒貶論春秋解經者失之作史者祖之則益失其旨矣  
宋祚歷三百餘年經國之綱領治跡之盛衰寔書以示  
後其義自見深方巧辟多出其子孫而為國諱者揜而  
益彰沿襲不決何以傳信吾友曹士弘甫深憂之蒐撫  
遺逸不替于昔時之議論自成一家其貫穿出入年經

月緯誅其私心附以旁證莫能遁迹桶往歲亦嘗以是  
自任故書燬廢不復敢曰微言曰帝在房陵豈乾侯之  
例耶外大夫不書卒書卒者其是耶士弘甫撫掌大以  
愚言為然嘗約吾二人當必任是事嗚呼士弘甫今往  
矣以余之識暗志荒不復能有成矣士弘甫讀書目過  
即成誦理財養兵禮樂刑政之損益折衷於古今而以  
通今所宜行者為之準其見於用也不卑于簿領而志  
足以展用取於友也盡其所長覆護以捨短故舉世一  
皆以為賢奉親孝事兄以恭訓諸生專席廣說耳領心  
會踵門受業後卒致顯仕初為郡史燕公、桶為大司



農辟以自近歷婺州純孝慶元丈亭廣德陳楊村杭村  
巡檢後入銓曹復授陳楊村楊村父老咸曰是嘗攝吾  
里者矣曹君善撫字今年饑必賑我、何之君諱毅武  
惠王裔孫五世祖某從隆祐太后辟兵過廬陵因家焉  
曾祖某祖某父某有詩集六卷祖妣周氏妣羅氏鄒氏  
以叔父某太學釋褐恩封孺人所為文若干卷纂言行  
編曰鈞元凡五十六卷疾革命諸子曰必返汝祖母故  
塋吾魂氣無不之得地即埋我卒以至大三年四月某  
日年五十有二子男五人汝霖今為兩浙轉運司書吏  
汝舟饒州器資宣州皆以秀才舉馳以醫業入仕幼桐

孫女一適劉某先卒孫男女七嗚呼人嘗恨位卑齷齪  
媚上甚則策功利以求進名在罪籍不自悔王公貴人  
持予奪生殺身死無足稱道較士弘所負所傳得失為  
何如也先師禮部尚書王公應麟為文餞之曰闕里高  
弟冉有用矛樊遲為右士弘為此官文武同方之道也  
侍講學士張公伯淳曰伯淳官慶元士弘在慈谿與之  
友不敢吏朱雲也汝霖汝舟皆能世其學恭定二年汝  
舟以書抵余求銘實不敢辭銘曰 匏也不食我心孔  
悲聿求玉明以策以馳輪囷知聞如山簇雲纂史闡名  
不屑於文緝墜紹緒執筆是紀年不稱德傳世則偉作



銘允哀以詔我同志

陳縣尉墓誌銘

咸淳閱十禩諸縣獨奉化號多士流出入太學上南宮  
亡慮十餘人於時蜚聲秀穎旁縣皆斂手避讓一時傳  
誦習讀謂清選不歲月可馴致未幾皇元合一皆失  
仕歸里挾策授徒疏糲自給俱不能享中壽子弟不自  
振飭復歸為農陳君亦咸淳甲戌進士不自矜褻接幼  
待賤謙抑愈加混跡蒿翳不知其為故官而得年且八  
十有一有子漢復能以儒自守其視前數公良憂過矣  
君諱觀字國秀嘗調臨安府新城縣尉十世祖崇尉奉

化因占籍焉子孫日蕃其最顯者曰太學博士著於君  
為兄博士倅貳臨安君館於其家君之考承務郎亦在  
館既策名客賀其兄復賀其父人咸榮之晚歲足不入  
城府州爭迎致率諸生以請業君一至即謝去徜徉岩  
壑侍博士窮幽挾竒連唱屬和有帙曰棣鄂集其自為  
詩文曰竅蚓集嵩里集延祐五年三月疾忽作猶力書  
中庸一章以授漢是月某日卒祖諱某妣戴氏以守節  
著事見州志考某承務郎妣臧氏董氏孫男二時說時  
敏孫女一已嫁次未行今葬剡源鄉畢駐里祔於曾祖  
迪功某之兆銘曰日垂崦嵫亦既見斗實命不逢怨



則屢疚布衣便、迄享大年執其韋編戒子於傳維陳  
令族詩書是續作銘昭、以告必復

靜清處士史君墓誌銘

大德七年楠官翰林史先生以書見貽不獲領後二十  
年子璧孫橐其書藁以示反復痛悼策勵於楠為甚重  
今撮要而表之曰斯文剝喪餘數十年師表郡縣學者  
應格則得未嘗 于其人後生不說學亦未嘗知學別  
偽務實而挽諸古子宜勉焉非可以虛談異也又曰吾  
將死得子文表於墓楠拜手讀之泫然以泣先生於外  
家為舅氏猶記拜先生于獨善坊論宦族纒屬文詞顯

著獨缺自吳丞相開新河有相者曰爾後當踵有之甥  
宜自重先生於諸經窮探微旨証墜緝缺不溺於謏聞  
剖釋正大而折衷一歸于前哲論古今得失必探情偽  
以暴其罪正色憤排若造庭而受其責也為文邃古不  
襍異說手抄口講更僕不能以盡孝弟遜讓知其出自  
然也先生諱蒙卿字景正生而奇領秀目七歲善屬文  
年十二入國子學通春秋周官經復兼詞賦江文忠公  
萬里常叅政挺時為大小司成器待之咸淳元年登進  
士第授迪功郎復州景陵縣主簿呂少保文德帥鄂檄  
入幕呂命先生勉蜀帥溫和解正陽圍温疑呂猜狙不



肯發微語撼之即就道凡所需器物一夕以辦温寔先  
公帳下校却立曰史監軍誠有子調穿山鹽場諭義勸  
輸戶不知有鞭撻十年改江陰教授復改平江至是不  
復仕故其詩文多感憤自喻礼部尚書王公應麟嘗勉  
曰思深辭悲學陶靖節其得之維鄞史族號相門曾祖  
諱滋早夫贈中散大夫祖諱彌鞏司封郎中贈少師司  
封以儒學致顯當貴盛時獨早退自持鄉人稱為獨善  
先生妣臧氏華國夫人考諱肯之中大夫湖北提刑兼  
知常德府贈大中大夫妣趙氏周氏大中熟邊事折衷  
料變有大帥才時宰尼之大中在湖北時謁告歸省後

巴川陽公岳學易春秋一年後歸國學乃中上第士嘗  
患固陋株守皓首不寤先生識足以窺淵懿經緯一原  
合師友之旨老而彌實確而不懈故其成就若是自號  
靜清晚歲罹厄窮講道不輟從者益衆天台多名山心  
樂之僑居者八年大德十年七月某日卒享年六十疾  
漸革語諸子曰我死必歸葬不能得資良累汝一有志  
其果能成也是歲十有一月柩歸祖墓明年葬於陽堂  
鄉穆與之原娶陸氏朝請大夫將作監合之女子璧孫  
墓孫堃孫臺孫女伯佺適葉信公夢鼎之孫揆翁仲忱  
適紹興中書舍人潘公良貴之曾孫世演二女未行有



文集二十卷易究一十卷託永遠於少賤誠不敢承命  
歲月逾邁而璧孫能遵守不貳奉遺言以請曷敢以不  
腆為辭銘曰 貞潔陸沉志裂金石秉言無郵厄則孰  
職驥伏於襄不稱其德塊獨結約忿決胸臆持丸障瀾  
盡瘁不休卒昌者名屢空靡憂生為完人歸藏於丘有  
子紹學曷怨以尤

清容居士集卷第二十八



書